

粹  
廬  
詩  
鈔

春暉堂存稿之三

春暉堂存稿之三

粹廬詩鈔

孫榮彬署





粹廬主人遺像



止竹題

# 序

浮生逆旅中年之絲竹皆哀疾景颯輪詩卷之光陰亦促然而韓毛鄉近尙遺風雅之音燕趙地靈宜有悲歌之士是以秋蘭芳芷動觸騷愁細柳新蒲尤多隱痛偶發揮於毫素遂疊積於巾箱擣麝成塵香留鼻觀藏龍在匣光騰斗墟若乃尊酒已空人琴俱絕辨鷄林之賸簡尋鼠壤之餘蔬固感舊者之深悲亦後死者之重任也芸生長兄學有淵源辭工諷諭饒太冲之卓犖奪開府之清新長我三年生同一郡牽芹類沼偕遊元禮龍門握蘭文司共步中台鳳署茫茫人海落落行蹤各隨肥馬之塵僅約隻鷄之局未嘗頻相過也越後數稔並寓鍾陵幕府依棲衡宇盱望於時秋娘顏改歲月已深春婆夢醒河山非故方且浮沈鷗鷺睥睨鸞每抵掌於風雲浸盟心於金石聚散夔軼之狀共解憐風出入魴鯉之交相忘飲水流光自愛韻事同探或七言成擊鉢之吟或六博引投驍之笑蕢酒則黃墟

共醉移來仙侶之舟張筵則青障不施親若家人之誼莊諧閒作談讌交傾自問  
生平斯爲盛會已迨後白門秋老黃浦春殘寄傲嵇生時招邀於吟榭養疴莊鳥  
屢顧訊於匡牀從此分攜漸逾浹紀潞河再遘京闕重隣驚絲鬢之添華翫玉鱗  
之墮甲沙洲梁稻何心黃鵠雲霄井幹梧桐聊永白駒朝夕雖墜歡之賴拾奈迫  
衰齡縱餘息之偷安難稱樂土牽絲刻木已增越客之悲炊劍淅矛非復班生之  
志邈年君且神傷奉倩病伴香山紙閣蘆簾長離德曜茶煙禪榻投老司勳人孰  
忘情天真有憾於是詠懷之什概多歎逝之詞歲甫古希數歸怛化嗣子鷹年葆  
其遺稿輯爲全編余與孫君摯哉爲之斟定以付手民名曰粹廬詩鈔凡四卷嗚  
呼人生憂患根於識字之初終古篇章多是傷心之賦以君通才魚雅壯志鴻鸞  
策進治安上規賈傅學開荒澁盛擬文翁歷盤錯之多端已雕鑄而殆盡紅蕖綠  
水人方羨其遭逢白髮青袍我獨傷其淪落至今而淵明三徑不見孤松元伯一  
邱已多宿草聽蕭瑟之夜雨天道寧論望寥落之晨星故交餘幾思君思我顧影

蒼茫疑夢疑真。填胸骭。髀宮卑調下知音。希海上之琴迹。往神留話。舊咽山陽之  
笛。別寒檠而作序。聊尋挂劍之盟。握短槩以編年。更檢樓羅之歷。昭陽協洽。陽月  
既生。霸靜海高。毓澎撰。

序

四

# 序

天津劉芸生先生榮彬族姑母之次子長榮彬十一歲以名諸生游學東瀛歸國後任京津教育要職除學部員外郎歷掌黑龍江教育翊贊蘇皖贛三省戎機觀察滬海樞江蘇菸酒參河北民政秘勿縮青島齟政移兩淮所至奏上攷政事文章重大江南北詩其餘事也榮彬於宣統間始見先生於保陽時先生以學部奏派視察冀晉等省學務榮彬適任直隸優級師範教務事一見相親備承啟誘後榮彬由鄂經陝改官白下先生亦自龍江南來遂獲朝夕相過從與靜海高崧荃太史及江左諸名流時爲文酒之會榮彬亦得附庸其間近年追隨於華北戎樞直隸筆硯下飽受薰陶獲益甚鉅今歲春榮彬調內務方以不獲日日奉矩臬爲戚乃先生不數月竟以勞瘁長辭濁世當彌留時諄諄以身後相囑何相愛之深耶榮彬以爲先生之身後事莫詩文若蓋皆平生經濟所寄足以名世千秋者先

生之文有粹廬三策及粹廬文輯已於生前付梓惟詩甫將粹廬詩鈔四卷鈔訖未及印此而不圖榮彬眞負重託矣今先生家事處分悉竟公嗣子師揚表姪鷹年將詩稿出欲即付印並求爲序榮彬不文曷敢序先生之詩乃請於高澗荃太史太史曰吾知先生深吾知先生之詩尤深吾必爲之序惟君亦應有以記其事遂將榮彬所知者及三十年來之關係並述如右助之編次詩稿者文安楊紹劉也鈔之者玉田袁熙鎔也皆先生之戚誼惟先生詩不止此搜求補輯當俟之異日中華民國三十二年九月中澣表弟玉田孫榮彬敬序

# 粹廬詩鈔目錄

## 卷一

濟南秋感用漁洋秋柳詩韻

小住濟垣旋來島上瀕行之夕承翰斯同九世五涓卿次山諸君寵餞翌日更勞郊送叨荷感情旣感且

媿車中賦此寄懷兼以志謝並呈叔鈞都轉

庚午秋末至青島

至青島視事後賦呈叔鈞都轉

胡秀松秘長及市府諸君子招飲官舍賦此答謝

張翰斯先生以其母鍾太夫人七十壽徵啓見寄賦此補祝

席上口占贈峻青

贈石蓀

粹廬詩鈔目錄

爲王仰先題梁姬小傳

青島客舍贈仲炤

雪夜得仲炤書侑以和詩二章因倒疊前韻奉答

和秋柳園六首次李靜齋原韻

膠濟道中作

京口渡江

揚州

徐園

泛舟至平山堂

揚州客次賦呈叔鈞都轉

任瑾存縣長以其尊人仞千先生行述寄示敬題短章用志景仰

海濱公園

春晚雨中散步

爲陳紹周題汪鷗客晴嵐煥翠圖

同九寄示德配馬夫人六十壽詩賦此奉和

厚矣來書侑以近作賦此奉答

秋興八首用杜詩原韻

秋日詠物詩四首用漁洋山人秋柳詩韻

和周岫芝詠黃芝詩二首

九日登高

擬杜工部諸將五首與蕭重樸明府同作仍用原韻

詠菊六律

詠蟹二首用東坡北臺詩尖叉韻

秋草用漁洋秋柳詩韻

詠霜二首仍用東坡北臺尖叉韻

題金子才周甲詩記用原詩起訖兩首韻

林簡和明府以近作聯防會議贈汎公子之什見示依韻奉和並寄汎親年姻丈暨勵菴明府  
續諸將五首疊前韻

追記夏秋間胸陽官舍即景

哀雁吟

冬至前五日作並寄淑卿

續哀雁吟

仲冬十五日冬至作

共和紀元二十有一載歲朝賦寄諸友

感時詩和重棧原韻原詩用諸將韻

後諸將五首再疊前韻

管營萬戶府銅印歌爲許君龍曾作

臘日

補前諸將五首三疊前韻

詠梅四首用漁洋秋柳詩韻

喜聞孚威上將軍歸至舊京賦呈一律即用昔年畫竹題詩原韻

祀竈日偶書

舊除夕感賦

立春後一日作 舊歷元日

和摯哉辛未歲除感賦原韻

壬申上元賦寄摯哉仍用前韻並簡重楫

失雁歎

蔡虎丞將軍以希鄭軒圖徵題爲賦兩絕句

題王紉衷先生佛影

吳孚威五十九壽

落花吟 詠賽金花事

彭東原青島寓齋即次壁間詩韻

粹廬詩鈔目錄

六

青島留別四首

膠濟道中

平浦道中

返故居

舊京謁孚威上將軍賦呈

天安門看花

蘇少衡以定情詩見示依韻奉酬即以爲賀

和雪南游勞山三首

李烈婦高夫人挽詞

竹醉日口占

卷 一一

筇篻六哥六十壽

采艾歌青島風俗端陽日士女結伴野行采艾

大浦舟中望月寄淑卿

昨歲來胸卽聞墟溝瑞石窩園之勝惜未一往近頃主人峻青將軍以書將意擬邀往游賦此寄懷並爲

異日之約

四都詠

題襟館 揚州運署同治壬申方子箴都轉題額

瘦西湖泛舟

秋海棠四首仍用漁洋秋柳詩韻

次韻和叔鈞都轉中秋節後遊金山並北固秋望之作

詠桂四首再疊漁洋秋柳韻

遵化溫竹溪先生挽章

岫芝先生以所作和天愁白海棠詩見示並附原唱依韻奉答

陳含光道兄以詩見贈依韻奉酬

粹廬詩鈔目錄

續秋興八首仍用杜詩原韻

爲包希庵題所藏李梅庵墨蹟卷子

楊州雜詩二十首用杜工部秦州雜詩原韻

初冬湖上

侯葆三先生遇於邗上以詩見贈賦此奉酬

前詩意有未盡再賦一絕並次原韻

寄淑卿

康山遠眺

聞雁

傅沅丈寄示秦遊日錄讀竟敬題二絕卽以答謝

冬至作

和友詠史

對雨

除夜偶成

元日

曉起望雪

渡江

自揚州至鎮江轉浦口登車北歸賦寄邗上諸君子

車行徐濟間風雪大至即事有作

車中望雪

平浦道中

並現省委春前招飲賦詩奉答並呈同席諸公

舊除夕

春日小蟬香館雅集得晤靜如廳長賦呈乞教

平津車上偶成

晨鐘

倉海以新年之作見示因次末章原韻奉酬

春雪

城南詩社會飲賦呈同社諸君子

同社諸老賦詩憐迎並爲預祝愧不敢承疊韻答謝

中和節讌集

城南社集分韻得珠字

賀吳孚威六十壽

暮春朔日城南社集分韻得城字

游頤和園

曉行口占

賀寧河齊公壽

挽王緯齋先生 武祿

題許琴伯畫佛

蘇星橋先生詩存三百首題詞

城南社集分韻得處字

張芻暉社兄爲其十一叔母徐宜人撰述事略徵集題詠謹成四絕用志欽仰兼慰仁波世丈悼懷卽乞

正之

徐鏡波道兄以五十述懷之作見示勉成一律藉當崧祝

也園曉步

茆珣加長招飲寓齋同賞梨花海棠分韻得欺字

挽林墨青姻丈

也園卽興二首

芹香姊丈約飲寓齋院有白海棠兩株著花甚繁席罷賦詩二首藉志盛會

天津道中

感事

陳筱莊六十壽

粹廬詩鈔目錄

一一

廉雅希以其配王夫人傳示因題兩絕以志淑行兼慰悼懷  
爲王廷鈞題其先德行樂圖

秋興八首三用杜韻

水西莊宴集分韻得成字

庸齋廳長以生日近作寄示次韻奉和

立春後一日平津道中作

卷三

元日感賦

題帝廬主人幽憂集

歲朝有寄

廣濟寺建醮

殷亦農長官五十壽

春丁將事有作

春日與諸同學稷園讌集

廉雅希以家存祖遺補服徵題爲一絕

題金粟如來記爲周芝叟作

孫摯哉以結婚念年紀念照片屬題

和風九移居之作即次其韻

田仲翰持示四十八歲初度之作徧徵和章次韻奉壽

元日賦呈諸君子

仲冬旬有五日六十五歲初度口占敬答知好

日本山口大佐松風以詩留別卽席奉和

喜雪二首用東坡尖叉韻

夏曆己卯歲朝有作

和寧河部長元旦書懷元韻

人日讌集寓齋賦呈諸君子乞正疊前華字韻

伯言秘書招飲卽席賦贈仍疊華字韻

山口信一佐倉寄懷次韻卻寄

上元卽事四疊華字韻

伯川將軍招飲頤和園紀事五疊華字韻

高伯言廳長之任保陽詩以送之

和陳牧青年兄新年偶成原韻

高伯言廳長有留別之作疊韻奉和

題黃公渚翊厂詞

和許琴伯桃源原韻

燕京八詠

喜雨六疊華字韻

己卯春上戊祀事禮成敬賦七疊華字韻

畿輔先哲祠春讌感舊有作八疊華字韻

撫帥總長五旬晉五疊壽賦詩奉祝卽用元旦書懷詩韻

得勵餘書卻寄

什刹海會賢堂讌集有作

顯周劍新結婚合照

高澤畲總理七十壽

齊少撫中校挽詞

王伯川將軍六十壽

初冬喜雪九疊華字韻

孚威上將軍挽詞

歲朝試筆

和寧河部長庚辰元旦步原韻

人日讌集

粹廬詩鈔目錄

一六

殷亦農長官有十二壽

陳牧青年兄以詩見貽依韻奉答

王度公局長招飲賦此奉酬並簡同席諸君子

殷亦農長官行將東渡詩以送之

送別

送寧河部長之金陵

撫公節帥歸自南京喜賦

撫帥督辦總司令五十六壽

方少峯署長屬題漁樂圖卷子

共和庚辰莫春甲午秋榜同年讌集中央公園來今雨軒叨陪客右爰紀以詩

曉過液池觀荷

立秋日曉起作

王伯川將軍挽詩

鳳九秘書東游詩以送之

得鳳九途中書並附和章疊韻卻寄

撫公節帥東行詩以送之

伯秋局長隨節出關賦此贈行

冬夜與松浦鳳九班侯孟揚伯午岫青塾哉潛齋冬生慶義意然諸君市樓小飲

陳鳳九以其夫人所作花卉卷子屬題

和吳夔厂六十自壽原韻

撫帥還京郊迎敬賦

長至日讌集和止齋原韻

元日偶成

祀竈日戲作

除夕

元夕

粹庵詩鈔目錄

一八

甲午秋榜同年夏日稷園上林春讌集

七夕

亦農長官將赴東京臨別招飲賦此奉酬

山崎先生七十壽撰詩爲祝即步自述元韻

杜鴻賓署長六十壽

藏園老人七十壽

液池晚眺

市樓夜飲柬彬甫

病中吟四首

病瘥口占

病中見月

雪

冬至後三日對雪疊前韻

亡室陳恭人生日追奠

病夜不寐

共和三十一年元旦適爲六十八初度詩以紀之

中夜忽寤不復成寐因賦以詩

一月四日鴻賓署長來視疾感賦

臥病兩月漸就痊可賦此自慰

大寒前一日雪再疊飛字韻

亡室陳恭人遺物

總座以江魚野豬等味徧餉僚屬余因病未與賦此並簡同人

歲暮

立春後二日雪仍疊飛字韻

祀竈作

梅花

辛巳除夕

卷四

秋柳四首追和漁洋山入原韻

後秋柳詩疊前韻

冬柳四首仍用漁洋秋柳詩韻

龍江春柳四律用漁洋秋柳詩韻

白門春柳四首用漁洋秋柳詩韻

白門秋柳四首用漁洋詩韻

虹橋秋柳用漁洋詩韻

憶長隄春柳四首仍用漁洋秋柳原韻

長城秋柳四首仍用漁洋韻

丁沽秋柳四首仍用漁洋秋柳詩韻

蓮池秋柳仍用漁洋詩韻

澗河新柳用漁洋秋柳原韻

蘆溝秋柳四首用漁洋秋柳詩韻

液池春柳仍用漁洋秋柳詩韻

液池秋柳仍用漁洋詩韻

冬柳四首仍用漁洋秋柳詩韻

液池新柳仍用漁洋秋柳詩韻

稷園春柳仍用漁洋漁柳詩韻

稷園秋柳四首仍用秋洋詩韻

長河新柳仍用漁洋秋柳詩韻

燕臺春柳四首仍用漁洋秋柳詩韻

臺城春柳四首用漁洋秋柳詩韻

曲陽新柳四首和郭漁邨明府原作用漁洋秋柳韻

粹廬詩鈔目錄

江亭秋柳四首仍用漁洋原韻

浣園秋柳仍用漁洋原韻

鑿臺春柳四首用漁洋秋柳詩韻

正園春柳四首仍用漁洋秋柳韻

柳枝感舊吟

# 粹廬詩鈔卷一

天津劉潛芸生甫著

濟南秋感 用漁洋秋柳詩韻

庚午秋暮復至濟南追念昔游不無感觸爰憶懷抱寄諸短章錄奉吟壇冀求郢政

秋氣偏驚客子魂游蹤猶記歷山門流光似箭渾成夢初月如弓正露痕宦轍廿年迷故道官溝五里見  
新村郵亭幾度滄桑感人事茫茫未可論

菊花天氣漸凝霜何處尋詩問柳塘野闊悲秋聞鼓角年豐憂國祝倉箱東藩杼柚傷周道孔壁金絲憶  
魯王曾過珠泉觀止水幾人留得表忠坊

欲向明湖浣素衣緇塵滿目愧知非雲連秦岱三山近州晏齊州九點稀避弋燕鴻還北嚮離羣烏鵲正  
南飛黃河倒挽疑天上回首鄉關願已違

鵲華秋色劇堪憐城郭微茫起夕烟靜夜澆愁惟魯酒新寒傳信到吳縣騷人心事皆詩料烈士功名在

暮年一抹殘山青未了防秋誰拱海東邊

小住濟垣旋來島上瀕行之夕承翰斯同九世五滑卿次山諸君寵餞翌日更

勞郊送叨荷盛情既感且媿車中賦此寄懷兼以志謝並呈叔鈞都轉

齊魯兵戈息相逢歷下亭舊聞如說夢新契已忘形愧我頭將白叨君眼獨青濫竽慚末學正策繼先型

惜別今何遽酬吟昨未醒酒痕應尙在轍迹若爲停是日客車  
四十分鐘同志盟秋水羣賢拱使星扶持多厚意

未敢怨飄萍

庚午秋末至青島作

勞勞客舍幾年間又到瀛洲夜叩關海右何人知北海山東有路表中山青島市中山路即  
昔日之山東路酸鹹世味須親

歷冷煖人情盡等閒笑指一拳問明月別來無恙是烟鬢青島乃海濱小島日人  
改名加蘇島者是也

至青島視事後賦呈叔鈞都轉

無端作吏到膠東世味酸鹹迥不同祇恐徬徨在中道擬葦舞鶴負羊公

年年抗俗走風塵，島上頻來亦夙因。三見桑田變東海，仍教餘事作詩人。

### 胡秀松秘長及市府諸君子招飲官舍賦此答謝

島上秋高敞畫筵，澄清夜氣淨無塵。樓船橫海推飛將

首席爲海軍沈司令

樽酒臨風集衆仙

同席諸君酒興晉豪

故事偶談

新志乘

席間與袁道油君所談

壯游猶記舊山川，醉歸留有餘香在。晚節黃花意共傳

筵前菊花生開

### 張鞠斯先生以其母鍾太夫人七十壽徵啟見寄賦此補祝

共和歲庚午來游，明湖潯澗。邂逅張子豪，漪殊絕倫。歡聚時未幾，復遵東海濱。前日貽我書，乞言尊所親。萱堂欣健在，養志南陔循。昨年開七秩，萊綈娛衆賓。相見惜已晚，未飲公瑾醇。時賢有佳作，俚句安足陳。邇來喜觀海海上，多仙人。安期棗如瓜，長生信有因。持此爲母壽，壽與喬松鄰。寄詩博君笑，補祝八千春。

### 席上口占贈峻青

海州南望氣如雲，曾向中江湖舊聞。今日相逢青島市，郵亭誰識故將軍。

### 贈石蓀

猶記當年史鳳家，玄都觀裏見桃花。春風人面今何處，前度劉郎鬢已華。

### 爲王仰先題梁姬小傳

花落空庭最惜春，錦衾香夢已成塵。深深鬱鬱西山下，悽絕當年采藥人。  
一篇遺傳費平章，往事重提淚數行。此是影梅龔憶語，情天恨海有王郎。

### 青島客舍贈仲炤

落落膠東岸，重來遇故人。且觀滄海日，未洗舊京塵。客裏年將老，閒中歲又新。僮留十日飲，共祝八千春。  
雪夜得得仲炤書，侑以和詩二章，因倒疊前韻奉答。

風雪挑燈夜書來，正早春勞勞年事改。忽忽歲華新，醉憶津沽月，游追滬瀆塵。豔陽天氣近，待約詠花人。  
和秋柳園六首次李靜齋原韻

秋柳曾傳唱和詩，王郎老去鬢成絲。名園搖落仍依水，不是當年載酒時。

蕭蕭暮雨見秋風多少樓臺倒影中誰更明湖傳韻事賞心難與四時同  
客舍青青間嫩黃春深猶記讀書堂臨風濯濯人依舊欲向靈和殿衆芳  
染衣佳話說登科轉瞬秋來客感多莫向金城增慨歎眼前生意自婆娑  
歷下流傳王客圖樹雲湖水兩模糊綠楊城郭今無恙可有江南舊句無  
西風殘照綠萋萋五柳當門徑不迷寄傲未能腰尙折一枝權作上林棲

### 膠濟道中作

曉起登車似御風征輪飛轉過膠東山留殘雪連雲白日浴滄波倒海紅人事勞勞新歲後客程歷歷舊  
游中玉壺應有冰心在持向明湖照影同

### 京口渡江

崑蕩長江水登舟意渺然風迴瓜步雪日出秣陵烟擊楫思前事投鞭憶昔年今宵揚子驛詩酒伴清眠

### 揚州

綠楊搖落暮鴉聲，  
邗上繁華舊有名。  
十里春風隨客到，  
二分明月照人清。  
相逢萍梗停船問，  
半老桃根打槳迎。  
欲訪隋宮無是處，  
不堪回首賦蕪城。

徐園

虎旅聲威震一方，  
徐園今日有祠堂。  
隔溪恰是湖心寺，  
誰向三賢爇瓣香。  
倚虹園圯已成塵，  
觴詠當年說冶春。  
淮海風流彫謝盡，  
更無青眼到詞人。

泛舟至平山堂

平山堂遠梵音空，  
山與江南迥不同。  
此是前朝大明寺，  
清高遺像祀歐公。  
危樓高處試憑欄，  
信是淮東第一觀。  
今古英雄淘不盡，  
六朝山色隔江看。

揚州客次賦呈叔鈞都轉

綠楊城郭紀郵程，  
今代漁洋負盛名。  
春意漸融金谷煖，  
冰心朗澈玉壺清。  
歷亭尚有蕭規在，  
淮浦應同魯望情。  
最喜二分明月好，  
流光仍照海東明。

任瑾存縣長以其尊人仞千先生行述寄示敬題短章用志景仰

學宗鹿洞重儒林補路修橋積德深空有白雲親舍在淒涼一卷廣游吟

有子今爲現宰官荷塘家世自清寒瀧岡片石歐阡表留與人間作樣看

### 海濱公園

一片園林占海濱振衣臨水滌緇塵危巖下瞰驚濤起却羨沙鷗自在身

### 春晚雨中散步

微雨絲絲潤麴塵朝來散步得閒身柳舒嫩葉垂青眼櫻綻新花點絳脣海可移情忘久客山如含笑睨  
游人登臨忽作江南憶婪尾將開待餞春

### 爲陳紹周題汪鷗客晴嵐煥翠圖

合浦珠還未足奇化工妙筆補天虧晴嵐煥翠開新卷應憶程門立雪時

重葺烟客舊林巒持較前圖伯仲間留與他年傳粉本雲容一幅米家山

同九寄示德配馬夫人六十壽詩賦此奉和

髯公老去轉多情四首新詩倚馬成星耀瑤池歌百壽月圓瓊島喜雙清喬松益篋堪偕隱蘭玉森階正  
向榮三十五年鴛牒在願持杯酒祝長生

厚弇來書循以近作賦此奉答

人海難容自在身勞勞終歲軟紅塵年衰久客惟防病世亂閒居不厭貧欲買溪山誰是主強招風月別  
爲鄰他年能否傲天幸同作長安市隱民

秋興八首用杜詩原韻

旋食胸陽條瘳秋至撫時感事情見乎詞下里謳歌敢云志吟壇大雅幸乞教之

涼風瑟瑟動高林斗大荒城氣鬱森灌水東廻連夕汐胸山西望積朝陰吟成宋玉悲秋音賦就江淹惜

別心對此茫茫增百感  
搗衣時節怕聞砧

蒼茫烟水夕陽斜  
兀坐官齋感歲華  
河內移民難挽粟  
天涯作客等浮槎  
傭書尙憂班生筆  
願曲誰憐蔡女笳  
叢桂未開荷欲盡  
今年孤負故園花

宵來涼月吐清暉  
閒步空園暑氣微  
露草偃牆蟲自語  
烟棹匝徑蝠初飛  
許量文字心猶壯  
馳逐功名願已違  
一水盈盈情脈脈  
似聞琴島蟹將肥

中原世局已如棋  
物換星移事可悲  
鼙鼓廿年成舊迹  
車書一統望明時  
雲回粵嶠征輶出  
風急章江羽檄馳  
白日青天心共見  
諸公臺省要論思

江南王氣鬱鍾山  
彈指光陰五載間  
左輔屏藩京口鎮  
北門筦鑰秣陵關  
願祈甘雨爭翹首  
誰解流霞可駐顏  
清節爲秋天宇朗  
中星歷歷列仙班

一從楚尾溯吳頭  
萬里長江別有秋  
救國未聞紅粟朽  
障川應使白圭愁  
嗷嗷中澤驚鴻雁  
汎汎清流狎鷺鷗  
九域馮功終古在  
陸沈今莫誤神州

燕市繁華永樂功  
春明猶在夢餘中  
清光卻憶長安月  
爽氣還思太液風  
西北補天雲尙碧  
東南觀海日先紅  
山川聚米論形勝  
欲問新豐折臂翁

天連淮浦路逶迤，賸有蒲荷彼澤陂。  
水落魚龍應不夜，月明烏鵲豈無枝。  
秋催潘老猶能賦，山遇愚公自可移。  
空憶純鱸鄉味好，詩成擲筆露初垂。

秋日詠物詩四首用漁洋山人秋柳詩韻

何處吟蟬欲斷魂，臨風倚杖到柴門。  
斜陽咽後猶留影，冷露餐餘尚漬痕。  
聲曳別枝迷故徑，哀銜落葉認孤村。  
平原一樹無情碧，高潔誰人可共論。  
秋蟬

天宇新涼尚未霜，蟲聲唧唧隔方塘。  
珠凝露白圍金井，絲吐烟青絡綺箱。  
鳴杼深闈驚嫵婦，篝燈古壁禮空王。  
蠶吟蟀鬪尋常事，莫感年華問舊坊。  
秋蟲

疏籬深處換羅衣，閃閃寒螢到眼非。  
隋苑宵長秋熠燿，平津人去路依稀。  
莫從昏夜教星替，敢向晴空近日飛。  
別有舞筵髮際不，因光耀與時違。  
秋螢

燕子經秋亦自憐，雙情影瘦假烟佳人綵。  
縷曾牽線公子烏衣欲著，縣泥落空梁。  
思去日巢營大廈待來年，伯勞一樣常爲客。  
暫溯歸程東海邊。  
秋燕

和周岫芝詠黃芝詩二首

岫芝雅興詠黃芝十首新吟絕妙辭比瘦西風華愛鞠延年甘露箭生芪耳傳佳訊宜高士鬚挺奇姿擬  
健兒留得九莖嘉瑞在祝君齡耆誦周詩

休將圖譜溯神農新茁祥英寶閣重飛蓋願隨葵日向分房肯受麴塵封尋芳有約磯盤鶴痛飲何年府  
抵龍猶是金臺顏色好商山深處訪靈蹤

九日登高

獨步尋詩上翠微海天東望欲忘歸黃花風落騷人帽紅葉霜侵遠客衣九日登高振秋氣百年如夢感  
春暉是日爲先母  
生日紀念烟縈一抹空溟裏看爾羣鷗任意飛

擬杜工部諸將五首與蕭重樸明府同作仍用原韻

金陵王氣接鍾山虎踞龍蟠鞏漢闕跋浪鯨鯢方海上升仙雞犬自雲間大旗落日軍容墨折戟沈沙戰

血殷裘帶風流今尙見美人歌舞盡歡顏

飛檄曾傳七十城無端歷下忽懸旌似聞臥榻容甯睡幾見操戈肯息兵佩劍峨冠姿颯爽登車攬轡志  
澄清樓船橫海將軍在籌筆誰能致太平

秋高遼海夜傳烽驚破瓊樓十二重兵略未開黃石卷璽書猶進紫泥封棧車絡繹軍前急芻粟徵輸塞  
下供已是咸陽成一炬儲胥休問大司農

連城起伏建昌標赤燄炎尙未銷伏闕請纓何慷慨歸田解甲太清寥雲移寶扇頻飛雉雪滿征裘憶  
賜貂黑水白山形勝地試將興廢溯前朝

破浪繚繞日下來石城霜緊角聲哀屠龍有技惟看劍市駿何年更築臺苜蓿空肥天仗馬葡萄待飲夜  
光杯珠槃海國聯翩會濟變還須借使材

### 詠菊六律

重陽天氣菊花黃老圃秋容慘淡妝淨土滋培分戊己羣芳管領拱中央西風綸閣人俱瘦夕照金臺徑  
已荒草服歸田稱壽者可能晚節有餘香 黃菊

花容淡白意夷猶，大士衣裳繪得不三徑。疏烟描倩影，一籬涼月寫新秋。泥蹤欲問霜前雁，浪迹還偕海上鷗。短髮垂垂曾插徧，華顛非復少年頭。白菊

滴粉搓酥盡等閒，新翻真本到花間。鉛華素映何郎面，珠蕊紅勻越女顏。嚙瓣冷添晴雪豔，蝶衣香曬夕陽殷。當年菊部人猶在，欲洗燕支別買山。粉菊

水墨枝枝點畫屏，餐英楚客醉初醒。簪花入格斜封敕，接葉留芳妙有亭。卓帽壓低雲潑黑，膽瓶添潤露垂青。無錢相對誰沽酒，飲汁三升愧白丁。墨菊

紫雲歌罷禁城隅，莫更尋花過舊都。芝宇半開迎日蕊，薇垣重挺傲霜株。輸他富貴羞稱魏，鬪到芳菲憶奪朱。籬下衆芳搖落盡，東來佳氣五陵無。紫菊

綠野堂深願久違，尊華秋好滿荆扉。玉容低亞仙人杖，翠色濃分使者衣。蘿徑開時花掩映，蕉天涼處夢稀依。牽芳欲作江梅寄，附入郵筒一騎飛。綠菊

## 詠蟹二首用東坡北臺詩尖又韻

蟹螯曾記手纖纖，高略何如傅譜嚴。宋傅肱著蟹譜詮次雅馴高似孫又爲蟹略以補其遺賞菊閒情宜桂酒，層蕘清味勝蠶鹽。占兵知

亂雲迎陣

江南俗諺有蝦  
荒蟹之占驗

辟瘡祛邪月挂簷

秦俗懸蟹於門以辟瘡疾蓋非  
特人不識蟹即鬼亦不識也

一世橫行終鼎鑊噬臍遺恨到團

尖

宜詩宜畫任塗鴉誰解承匡當五車

戴記蟹有匡句解者多不能詳吾津兒童謠語有云老服老張頭戴  
破篋剪子兩把篋子四雙即隱指蟹可爲蟹匡之確解匡古篋字

展到雙螯爭

稻穗團成一體隱蘆花光明夜引分漁火聲價秋增問酒家莫漫落湯太忙亂

莫似落湯螃蟹手快  
脚亂語見五燈會元

狂吟只

合付劉叉

秋草 用漁洋秋柳詩韻

南浦曾銷送別魂秋來非復碧盈門徑荒難覓春泥迹木落纔添宿燒痕幾處烟榛迷古戍誰家露積隱

孤村兀狐率野嗟周道滿目玄黃意莫論

零露初溥欲降霜更無清夢到池塘飢鷹眼疾剛離絆羸馬蹏輕尙服箱滯浦蘭荃吟屈子蘇臺荆棘怨

吳王誰尋朱雀橋邊路沒盡瞻園舊日坊

天涯屢換昔時衣千里青青一望非賈誼宅前人去盡武侯祠畔客來稀殘螢隋苑猶相照寒蝶西園正

對飛若問王孫歸也未廻黃轉綠願多違

美人遲暮儘堪憐，莽莽平蕪帶晚烟。  
黃土埋香太蕭瑟，青袍留影尚芊綿。  
江南消息曾三月，原上榮枯又一年。  
更待東風爲噓拂，瀛洲重綠海雲邊。

### 詠霜二首仍用東坡北臺尖叉韻

秋深無復露纖纖，更鼓初沈夜氣嚴。  
落月橫天初屑玉，峭風未雪已飛鹽。  
鴛鴦冷壓鱗鱗瓦，鸚鵡寒驚短短檐。  
獨有菊花能自傲，持螯消息問團尖。

曙日東升欲噪鴉，板橋人迹逐征車。  
入林黃到千頭橘，著葉紅於二月花。  
曉角催寒悲久戍，疏鐘驚夢近僧家。  
輸他愛晚尋詩客，八韻吟成手八叉。

### 題金子才周甲詩記 用原詩起訖兩首韻

春申江上介眉時，想見高人自撚髭。  
家國盛衰身世感，盡收陳迹入新詩。  
六十年中一卷詩，栽花滿縣映埕巵。  
翠微深處喬松隱，常願提壺伴牧之。

林節和明府以近作聯防會議贈汎公之什見示依韻奉和並寄汎親年姻丈

暨勵菴明府

禹貢山川首冀州。文通武達屬名流。三年報政皆循吏。萬井提封盡列侯。楊沈酣須共警。同袍偕作莫相猶。自慙浪迹清淮上。未得簪毫記壯游。

續諸將五首疊前韻

誰將三箭定天山。楊柳春風不度關。使節未歸滄海上。兵符仍滯彩雲間。數奇李廣頭先白。物化萇弘血尚殷。二十年來時易逝。沼吳無計太羞顏。

奕葉雄封擁海城。竟無強力抗戎旌。鐵冠虛作黃圖夢。銅柱堅塵赤壁兵。誓與偕亡嗟日喪。願瞻全盛俟河清。賜秦鵜首疑天醉。碁局分明最不平。

津橋月黑警狼烽。回首鄉關意萬重。南國誰還憂北顧。東鄰今欲肆西封。信傳飛鵠愁何極。炬列奔牛力不供。滿目瘡痍元氣盡。高陵伏莽在勞農。

度遼空見姓名標。赤手屠鯨恨未銷。反舍魯陽殊寂寂。劫盟曹沫已寥寥。氣冲越劍看騰虎。怒擲儒冠恥

續貂忠憤普天歸紀錄飛書馳檄待中朝

漂搖風雨自東來笳鼓聲中百感哀  
覆轍莫尋箕子國同仇還望粵王臺  
籌邊偉略書三策身後浮名酒一杯  
安得孟明修國政補天終屬救時材

### 追記夏秋間胸陽官舍即景

佐治無端用作鹽厭聞長夏雨  
纖纖蜉蝣糝徑方飛絮蚊蚋穿梭又入簾  
庭草不除添柏韻  
柏韻移爲臨事之名  
階苔常滑帶梅炎百川秋水汪洋甚  
滿地蘆蒿只露尖

### 哀雁吟

胸市有捕雁者將罽以爲醢柯君又生出而見之  
取購歸縱之於庭使人畜焉余哀此雁乃爲斯吟  
禍福本不測升降安有常死牛原夙定德怨終無忘  
念爾隨陽鳥生小居炎荒北行遠出塞東  
迴探扶桑振翮橫四海壯志何軒昂  
一朝羅罽繳奮飛嗟無方麒麟且爲脯  
敢怨庖人狂已入枯魚肆刀俎况在旁  
絕處忽逢生籠鵝欣遇王擬彼寫經  
換生命金錢償歸來解其縛如見天  
日光感君好生德嘉惠銘中藏

飲啄各有時，維繫駒食場。何爾意不滴，夙夜仍徬徨。哀鳴念儔侶，歸思隔衡湘。欲展摩天翼，零落難成行。終日逐雞鶩，州令稻梁冥。飛弋人慕顧，瞻堪自傷泥。雪偶留迹，錄羽胸山陽。願藉春風力，凌雲同北翔。

冬至前五日作並寄淑卿

昨宵星月自清寥，曉起微陰凍未消。一水盈盈隔青鳥，老妻生日是今朝。已是風塵老半生，更從淮浦紀行程。明年此日身猶健，能否看梅在舊京。

續哀雁吟

雁既被放止于後圃，偶因所見續有是作。

哀雁已戢翼，羣羣高寒抑鬱。不能語含意，誰爲傳同茲。鳥獸羣四顧，何茫然。睨視衆犬狂跳踉，超其前。迴首見浮雲飛鳴羨鳥，爲對此百感集。憂來心如煎，日暮何所託。荒園生夕烟，奮志會有時。一舉將沖天。

仲冬十五日冬至作

晴窗喜色見朝暾  
寒擁重衾夢尚溫  
客裏又逢長至節  
純鱸鄉味是餛飩

乾淳歲時記冬至享先以餛飩有冬餛飩年餛飩之謬吾津謬亦云冬至餛飩

夏至

柳舒梅放助詩情  
雲物初陽已漸生  
今夜月圓剛十五  
不妨風俗擬占城

文獻通考占城國俗定十一月十五日爲冬至入皆相賀州縣以土產物帛獻

其王

密線縫衣念母慈  
薦飴獻履昔年時  
春暉寸草成追憶  
忍誦尊前訓子詞

用晉周顛母冬至舉餼賜子事

小春纔去早春來  
海國冬回漫引杯  
欲效東坡作重九  
可能常見菊花開

東坡在海南藝菊九晚以十一月望日與客汎酒作重陽故有菊花開時即重

陽之句見王容齋積筆

## 共和紀元二十有一載歲朝賦寄諸友

搔首天涯歲又更  
纔過冬至盼春明  
蒼麀載筆尊周正  
白獸開樽憶漢京  
二十嘉年誰紉越  
三千弱水杵  
談瀛萬方多難  
羞稱賀未肯隨緣作頌聲

## 感時詩和重煤原韻

原詩用諸將韻

衣冠何處訪西山  
天問難通造化關  
一臥碧雲榮地下  
雙懸白日耀人間  
聲靈尙見容光照  
信誓徒傳口

血殷留有故家遺俗在糟糠薄命惜紅顏

六代興亡溯石城將軍旗鼓大夫旌沐猴笑楚頻爭席封豕滋吳早伏兵滄海揚塵移艮嶽湯泉留滓洗  
華清奉春遺策匆匆定誰更論都憶北平

頻年戰火未銷烽失卻烟花一萬重杼柚共傷周故道屏藩誰守漢提封宜防竹榿薪何屬王祭苞茅酒  
不供利析秋毫跨解阜莫將鹽鐵問司農

號呼在口語新標五色雲旗迹已銷妖服化男儕未喜戎衣飯佛侶參寥勳名幾輩矜遼豕恩澤餘封重  
漢貂太息霜才衰歇盡推衰往事話興朝

攀鱗附翼過江來破碎河山祇益哀豈有才人嫁厮養誰教傲吏作興臺傭書半世思投筆看劍中宵試  
引杯天下爲公期郵治可能橋梓盡成材

### 後諸將五首再疊前韻

初聞誓墓紫金山天馬行空出近關虛谷潛蛟三島外孤雲野鶴四明間通侯白皙年猶壯之子紅妝色  
正殷一局殘碁收不得推枰斂手讓蒼顏

燕臺一去即專城，長路悠悠假旆旌。  
舞尙酬金谷，酒凱歸先罷錦州。  
兵竊符救趙，誰偕作望楚懷沙肯。  
獨清雪夜擒吳功，在否惜無人繼李西平。

據、案、顧、盼、絕、妖、烽、險、扼、江、橋、第、幾、重、距、海、魯、連、恥、秦、帝、籌、邊、德、裕、拱、唐、封、不、妨、退、舍、收、餘、燼、尙、解、輸、財、濟、  
正、供、回、首、龍、城、舊、遊、地、屯、田、有、策、在、安、農、

梅花官閣挺清標，獵渭非熊夢未銷。  
漢水刑牲紅日近，吳山立馬碧天寥。  
欲盟沈鹿聯諸華，莫使多魚漏  
豎貂卻憶河陽九節度，曾傳伐叛歷三朝。

緼袍芒屨忽南來說，到時艱涕淚哀偏。  
自有人推柱石豈真無地起，樓臺辨奸巨眼曾揮筆。  
敵愾同心漫擲杯，燕趙悲歌豪傑盡，更誰抑塞拔奇材。

### 管軍萬戶府銅印歌爲許君龍曾作

龍曾持朱搨印模文曰管軍萬戶府印云此印銅質得自贛榆鑄有龍鳳年號爲韓林兒時遺物屬余  
爲詩紀之余按元代置各路萬戶府爲管軍官秩分上中下三級有達魯花赤萬戶及副高戶等職皆  
世襲至明始廢豈韓林兒據亳州時尙沿襲元制歟因物興感乃作短歌

英雄割據已黃土，獨有頑銅尚千古。  
綠色斑斕朱印文，認是管軍萬戶所。  
此印來從淮海湄，傳言遺自韓林兒。  
龍鳳紀官吏不載，書生考據姑闕疑。  
埋石沈沙忽易代，刻印銷印幾興廢。  
風塵中有蛟螭蟠，閱盡滄桑任顯晦。  
君不見登壇拜將驚一軍，銀鈎鐵畫安足論。  
奪取金印繫刑後，斬鯨遼海清胡氛。

臘日

臘日猶寒春未回，凍雲低壓灌河隈。  
官衙無事如僧靜，尚有清齋佛粥來。

補前諸將五首三疊前韻

重入燕京虎在山，孱王已去自當關。  
尙書履接星辰上，王母旗翻日月間。  
四世公卿華族赤，千秋功罪彩毫殷。  
黃袍未就金甌缺，異代雄才孰抗顏。

前鋒已薄武昌城，忽地回戈擁漢旌。  
抗議連摧銅馬帝，防邊奮起鐵驪兵。  
將軍西第休稱頌，丞相東山枉待清。  
儘說苦吟參佛理，園基心事恐難平。

黃榆關外徹滌烽，銅雀誰扶紫閣重。  
洛水驚鴻開宴飲，衡山迴雁劃疆封。  
楚弓得失曾何補，蜀錦盈虧尙

待供種竹蓬萊留舊句海濱招隱願歸農

射虎聲威姓字標三吳兵氣已潛銷洪都開府何清逸下瀨橫戈忽寂寥西去難招華表鶴南來曾珥漢宮貂碑銘零落名園改烟水無人開六朝

安東建節不重來賦到江南盡可哀欲整鸛鵝收歇浦忍看麋鹿走蘇臺射潮虛負三千弩飲滌難酬一百杯四十功名今已暮故山猶說棟梁材

### 詠梅四首用漁洋秋柳詩韻

未春先返暗香魂何處探梅靜掩門料峭衝寒山有意橫斜寫影水無痕督師埋血留芳嶺祭酒編詩記舊村五月江城花落盡吹殘玉笛不堪論

月落參橫滿徑霜美人消息隔瞿塘成龍有骨惟強幹相馬前身漫服箱鄧尉誰題香雪海孤山宜配水仙王故都猶有蘭芳在愁說梨園舊教坊

批紅判白坐苔衣鐵石心腸賦裏非山入羅浮嫌夢短世無和靖歎知稀隴頭春早香初動驢背詩成雪又飛莫問和羹調鼎事作鹽今已與時違

風標清不受人憐，老鶴相依立暝烟。  
采藥尋仙逢綠萼，巡檐索笑擁黃綵。  
肯隨羣豔娛韶景，自賞孤芳惜晚年。  
更盼江南春信好，一枝遙寄到君邊。

喜聞孚威上將軍歸至舊京賦呈一律即用昔年畫竹題詩原韻

已是乾坤到處家

原詩首句俯仰乾坤到處家

歸程歷歷朔風斜，陟硯瘡馬身猶健。  
遵渚飛鴻鬢欲華，清節曾瞻淇澳

竹舊游，還憶洛陽花都人競譽。  
將軍樹莫向青門更種瓜。

祀竈日偶書

東厨司命夙稱尊，風馬眞能叩帝關。  
薦到黃羊家便富，莫將媚竈笑王孫。

舊除夕感賦

急景催人夜氣虛，參中正是立春初。  
廼思三十年間事，兩度離家過歲除。  
幾番憂患感餘生，風雪殘冬欲二更。  
兀坐微吟嫌夜永，怕聞爆竹送年聲。

癸卯除夕適在日京

立春後一日作 舊曆元日

斗柄東回止建寅太初舊曆紀壬申敢將柏葉銘新歲誰贈梅花寄遠人佳節難酬千日酒征衣未浣兩  
京塵胸山殘雪添雙鬢細數年華問早春

和摯哉辛未歲除感賦原韻

頻年客裏問行藏湖海遊遊道阻長秦楚風塵同歲月燕吳泥雪共星霜傾囊愧我詩猶富避席輸君酒  
尚狂記否玄都前度事種桃人去待劉郎

星回律轉已如流急景催人易白頭猿鶴北山休促駕蛟龍東海漫擎舟欲揮馳檄飛書筆誰築籌邊策  
敵樓浪說雄文擬司馬惜無同調用吾謀

壬申上元賦寄摯哉仍用前韻並簡重楫

人海浮沉久遞藏閒中歲序覺春長寸心遙共今宵月兩鬢頻添昨夜霜強仕肯容陶令隱窮途未改步

兵狂燕臺燈市應如舊誰數歸期間阮郎

萬斛閒愁等濁流胸山渤海屢回頭幾家詞賦匡時策半世功名逆水舟日出東南飛孔雀雲浮西北有高樓與公穎士俱清望可許良田與鶴謀

### 失雁歎

哀雁昔失羣偷生幸有託飲啄性已馴依依傍官閣昨忽失所在蹤迹難忖度羽毛猶未豐安能橫朔漠不與稻粱謀胡爲遭鼎鑊生死未分明禍福誰探索逝者今已矣念昔殊落落萬物本同歸大地舟藏壑生當隨飛鸞死卽化遼鶴想像形影間寒月入林薄

### 蔡虎丞將軍以希鄭軒圖徵題爲賦兩絕句

廣廈曾開千萬間歸來福地有嬋嬋將軍西第連雲起畫裏宜添夾溧山  
萬卷圖書產最良開軒人在鄭公鄉傳家不藉鑿金富恩澤餘封此墨莊

### 題王級衷先生佛影

曾過高人養性廬，鬚眉如畫見真吾。  
現身欲說生公法，我佛慈悲德不孤。  
起死回生仗國醫，鬢絲禪榻憶當時。  
心經一卷參三昧，坐老蒲團奉藥師。

### 吳孚威五十九壽

瓊島春回見壽星，詩廚周甲頌延齡。  
洛濱鶻詠留金谷，漢上題襟憶洞庭。  
憂國有懷頭欲白，憐才隨處眼常青。  
茫茫人海笙歌滿，誰識賓筵只獨醒。

風塵萬里一身旋，松柏同榮竹並堅。  
弧耀南箕添歲月，槎迴西極說山川。  
丹心常耿希關岳，皓首爲期儼  
僊僊反日揮戈勞，願盼祝釐待賦凱歸篇。

### 落花吟 詠賽金花事

彩雲易散恨無涯，飄泊浮生孽海花。  
一日長安誰看徧，春風得意狀元家。  
王母瑤池夜宴開，碧桃花下侍香來。  
優曇一現匆匆甚，青鳥西飛竟不回。  
夢裏紅妝憶少年，榮枯無定等朝烟。  
飄茵墜溷尋常事，薄命如斯亦自憐。

曾入僻鸞宿禁林海棠深，謔借春陰琳宮已罷天。  
魔舞神女生涯杆散金，殘紅銷盡漸成塵。  
燕去梁空草不春，只惜宿根無著處。  
返魂羞說墜樓人，飄零蝶夢泣鵲聲。  
老去楊枝尙玉京，誰更留春新賽會。  
惜花人有護花情。

彭東原青島寓齋即次壁間詩韻

精廬一角碧山隈，下有驚濤起熱雷。  
莫向樓窗觀日出，待看橫海斬蛟回。

青島留別四首

去住何心問水濱，閒雲野鶴寄吟身。  
浮家隨地堪偕隱，作賦登樓敢效嬰。  
桑下已償三宿願，花間能醉幾回春。  
詩仙未到勞山頂，魯道無緣愧谷神。

三度居青  
未登勞山

破碎河山鼎革前，我如辛有適伊川。  
壯遊虛附乘槎使，互市兼傳勸學篇。  
避地未逢長樂老，畫疆猶記靖康年。

今青島市區即清代割讓於德之膠澳境界

滄桑變易曾三見，浮海何期結後緣。

清時德據膠澳設有青島高等學堂，辛亥余以視學至青，是爲初遊。戊辰春再到，庚午秋三至今又學。

家北歸暫  
與青別

海上風帆再到時南飛鳥鵲已無枝櫻花笑客山仍在桃葉爭春歲不知憂國願聞龍戰息依人翻覺燕  
來遲五年蹤迹還仍舊贏得星星兩鬢絲

誰教老驥服鹽車過眼雲烟隔歲餘故紙鑽研惟賸馥歸裝珍重有藏書節常穀雨春將去情比桃潭水  
不如琴島買山無我分紅塵燕市愛吾廬

### 膠濟道中

料峭春寒尙暗侵宵征不寐只微吟海雲東望心猶戀山月西斜魄未沈旅宿情懷嫌夜永客程經歷逐  
年深浮生碌碌車輪轉願息勞薪返舊林

### 平浦道中

三載離鄉去復回燕齊道上滿塵埃浮雲扇影將圓月流水車聲啟蟄雷碧毯平鋪新麥出黃金散盡野  
花開舊京明日逢鄰叟應說劉郎今又來

返故居

萍蹤重聚又燕都海上歸來尙故吾  
碧柳當門待羅雀玄文在室感揚烏  
悔教藜菊荒三徑舊種雙棠臘  
一株小住仍須淮浦去漁翁滿地是江湖

舊京謁孚威上將軍賦呈

洞庭湖上泛樓船回首前塵已七年  
霜雪侵髭驚日月河山過眼幻雲烟  
范韓偉略人思奮褒鄂英姿世  
早傳隻手狂瀾期共挽聞雞先著祖生鞭

天安門看花

天安門外看花來風力東西任意催  
草木不知春欲盡芬芳紅紫向人開

蘇少衡以定情詩見示依韻奉酬即以爲賀

綺情老去未消磨且向妝臺侍眼波  
二月好春冰未泮已看牛女會銀河

華燭明燈憶昨朝，腰肢依樣見柔條。故宮眉黛翻新甚，語燕呢喃尚舊巢。  
別有清才似牧之，隱娘豪氣擅英詞。雙修福慧人爭羨，詩集新編號埽眉。  
和靖仙梅紙帳輕，歲寒松柏結新盟。吳門未許梁鴻隱，德曜相偕即弟兄。

### 和雪南游勞山三首

勞山高不極，先問太清宮。石磴雲常白，丹爐火尚紅。耐冬縣愛日，表海振雄風。九點齊烟在，茫茫百感中。

太清宮

聞道明霞洞，幽棲定有人。谷深猶積雪，地僻不飛塵。健步忘勞倦，怡情訪隱淪。滄溟縈在抱，涵養海天春。

明霞洞

欲宿華嚴寺，登臨近海隅。巖風迎客早，山月向人孤。勝境宜仙佛，清談雜鬼狐。高僧有詩句，題壁未模糊。

華嚴寺

### 李烈婦高夫人挽詞

莫將薄命惜紅顏，勁節常留天地間。  
片石千秋同不朽，鴻山應是望夫山。  
橫流浩浩盡堪傷，獨有孤標百世芳。  
旌節花開鵲血在，齊烟九點擁貞坊。

竹醉日口占

種竹經年嫩綠成，今朝韻事記龍生。

岳州俗謂五月十三日爲龍生日，宜種竹。

雍和宮裏新崇祀，風馬雲車向北平。

人生似竹亦風流，一醉何妨萬事休。  
可有中山千日酒，平安度過太平秋。

# 粹廬詩鈔卷二

天津劉潛芸生甫著

## 竺笙六哥六十壽

共和歲壬申仲夏月初吉演廬應壽昌大年躋六秩有弟名曰潛賦詩以紀實至敬本無文屬辭不嫌質  
上溯癸酉年月五日維七地當古封州誕生事可述勝國中興時海宇正清謠吾祖方莅官政聲何峻遙  
三秀見孫枝銜齋喜氣溢承歡侍重闈含飴俱繞膝相偕徒潢泉嬉戲爭棗栗祖孫兄弟間融洩樂家室  
時運良不齊批離將誰恤風塵倏十年南朔若相失轉瞬已成童居杭復覲瞻詩書苦鑽研稍解勤蛾術  
七載湖上游光陰殊迅疾同舟喜還鄉省試脫穎出共采芣侯芹瓚壁聯芳蕊甲午制科開金臺競挾瑟  
兄獨登賢書我乃遭屏黜鯢鮓跋浪來師輿每失律公車仍北行安危未可悉一醉津沽春談次相惴慄  
乙未春夏秋家難堪驚怖苦病憂未忘椿萎傷不卒盡室遂北遷艱難勛無逸鄉居擁泉比朝夕事佔畢  
時賢文字交情成擬膠漆庚子劫灰餘浮生如蟻蝨邦舊命維新興學自廼踈負笈探東瀛輕舟載書帙

浮海賦歸來蓮池過從密學部初設官市駿爲倡率愧我溷縑塵惟兄志專壹一校三十年循循如一日  
鄒魯曾人師棲遲在衍泌共和建國初敷教資良弼白宮虛席求徵車遠蓬華退謁承明廬高蹈誰能匹  
褐衣返故居榮祿等蛙鶴爲國育才額璇題五雲霽聞譽貴施身榜門又何必靈桂屬老成人中有屈軼  
願安原憲貧功名輕萬家食能自甘美哉元亮秫觀書猶眼明然藜逢太乙餘事作詩人輞川王摩詰  
鍛鍊身體強睡味甘如蜜養生自延年無待參苓朮伏女可傳經進士原不憚慰情已勝無從游况有姪  
古稱鄧攸賢知命詞不窒喬松相與期南山何嶮幸我生小一齡紀年乃甲戌萍蹤滄海濱踰淮爲枳橘  
欲獻介壽詞惜無五色筆猶憶少年場誦詩學舞佻天中節甫過昌陽夏方苗北望祝遐齡長歌當百一

采艾歌

青島風俗端陽日十  
女結伴野行采艾

榴花紅映菖蒲綠輕羅細縠人如玉瑞陽日午采香來艾葉參差徧山曲昔聞海上去求仙采藥尋山不  
計年遺俗流傳青島市誰將采艾入詩篇采艾見於毛詩芳原雨過苔黏屐莫誤春郊踏青客手持艾把倚危巖  
海波一色連天碧贈芍采蘭溱洧濱美人香草步芳塵五絲結作同心縵采艾還須贈愛人

# 大浦舟中望月寄淑卿

海州舟上遠行人起視秋天月一輪任我摩挲醒後眼頗卿珍護病中身多疑自覺徒傷氣過慮應知最損神安得桑田營十畝灌園借隱日相親

昨歲來胸即聞墟溝瑞石窩園林之勝惜未一往近頃主人峻青將軍以書將意擬邀往游賦此寄懷並爲異日之約

聞道墟溝近海濱東環黃渤渺無垠競傳何氏山林好曾見臨淮壁壘新風雨談心期後日雲烟過眼憶前塵謝墩暫莫矜高隱灑水功名待此人

海上名標白寶山將軍姓字碧峯間精廬得地常留愛瑞石題窩漫笑頑秋水一泓澄素抱朝陽萬象景蒼顏巾車何日尋詩去旦夕從君共往還

## 四都詠

新都 南京

龍蟠虎踞舊雄圖別建新京說首都誰溯興亡論六代且爭形勢控三吳過江莫使清談誤設險端須大  
德孚東望鍾山林墓在蔥蘢佳氣萬靈趨

故都 北平

一自滄桑世局更頓教風物感燕京禁垣已共遊觀樂譯館猶留信使盟萬里邊防馭蒙滿兩朝都會鞏  
明清金臺瓊島常如舊文化中心是北平

行都 洛陽

石頭城下戒舟航忽劄行都到洛陽九鼎可遷於地險三塗無恙笑人忙孟堅有賦魯東漢子建何心步  
北芒莫更天津橋上望杜鵑嗷處盡思鄉

陪都 西安

眇眇馮旬九州寬百二河山勢鬱蟠南部烟花仍建業西陵雲樹又長安賜秦儻藉鶉維固望蜀何辭鳥  
道難太息周原人物盡陪都重訪古衣冠

題襟館

揚州運署同治壬申  
方子篋都轉題額

別館詩碑踏曉烟題襟韻事憶前賢白頭老隸偷閒說回首滄桑六十年

老公丁艤林在署  
服役已六十餘年

## 瘦西湖泛舟

瘦西湖畔綠楊村，往復輕舟近北門。  
九曲清溪疑白下，半林殘照欲黃昏。  
風迴柳拂搖烟影，浪破萍開劃水痕。  
更向平山堂裏去，舊題詩句待誰論。

名山勝境屬觀音，黃榜猶題功德林。  
欲瞰滄江登嶺表，重尋古寺到湖心。  
鴉爭晚景回翔集，蟬送秋涼斷續吟。  
廿四橋邊淘逝水，二分明月幾升沉。

## 秋海棠四首仍用漁洋秋柳詩韻

揚州巖巖墻陰砌，下秋海棠甚蕃秋。  
花盛開孤芳自賞，因物興感乃爲是詩。

送春韜返杜鵑魂，點染秋光又到門。  
一徑曉烟描倩影，半階涼露拭啼痕。  
疏疏冷豔黃花地，渺渺離懷烏柏村。  
淚盡羅巾思婦怨，玉顏羞向鏡中論。

落木微波未降霜，西風瑟瑟過蓮塘。  
強隨積葍偎金井，誰許簪花近玉箱。  
芳草埋憂悲楚客，綠苔填恨託陳王。  
望夫山下靈根在，化石應留百代坊。

秋來新結薜蘿衣，銀燭紅妝舊迹非。  
青粉墀低花綽約，碧紗窗靜夢依稀。  
朝暉欲上蛩何語，暮雨初成蝶  
尙飛杆說惠園芳訊好，聘梅終覺與時違。

一抹秋容劇可憐，  
暉涼如水月如烟。  
紅笳薄暈疑中酒，  
翠袖新寒欲試絳。  
小草榮枯關世運，  
閒花開落得天年。  
棠陰漫溯題襟館，  
自賞孤芳古砌邊。

### 次韻和叔鈞都轉中秋節後遊金山並北固秋望之作

大江淘盡幾英雄，  
閒上金山望海東。  
萬里舟航趨北固，  
九秋樓閣倚西風。  
塔鈴無語諸方靜，  
玉帶常留勝蹟空。  
過眼滄桑增百感，  
誰將缺月補天工。

中秋節後遊金山

山亭高聳古城邊，  
日極長空杳杳然。  
雲樹萬家迷午市，  
金焦兩點擁秋烟。  
江通蜀錦思鄉客，  
風送吳鹽上水船。  
北固蒼蒼甘露寺，  
那堪重話革除年。

北固秋望

### 詠桂四首再疊漁洋秋柳韻

天香清可沁詩魂，  
曾共槐花踏禁門。  
象郡有林堪作貢，  
蟾宮得月便留痕。  
願偕松菊芳三徑，  
擬借桑榆蔭。

一村老性常存，豈是伴朱華翠葉不須論。

子落驚秋歷十霜，連村賸馥尚池塘。九天神話傳修斧，八月科名笑負箱。幽谷叢生憐屈子，小山招隱憶淮王。當年宮館無尋處，且醉椒漿向酒坊。

颯爽新涼白袷衣，堂東消息想非非。一枝擢秀延秋早，五子聯芳並世稀。金粟界開仙露浥，木樨禪定妙香飛。留皮亦是籠中物，只惜參苓與俗違。

寫盡丹青強自憐，秋風動處滿林烟。和飴滴粉甘于醴，點石鋪金薄似縣。天上種傳靈隱寺，殿前曲記建安年。一山留得餘馨在，作楫中流又水邊。

### 遵化溫竹溪先生挽章

唐有飛卿晉太真，君家才調本無倫。如何鳥化雙鳧去，一夕匆匆竟絕塵。  
比歲容城作吏忙，果然花滿頰。河陽歸裝依舊清，貧甚只向椒山燕瓣香。  
吳頭楚尾幾經年，知己無人意泫然。留有寸心明月共，夢魂常在太湖邊。  
茫茫百感獨憐君，身世乖離不忍聞。從此青山好埋骨，西郊風雨問秋墳。

岫芝先生以所作和天愁白秋海棠詩見示並附原唱依韻奉答

棠陰隨處紀韶年，誰更呼名問謫仙。  
粉署夜涼時弄影，玉堂人遠尙爭妍。  
素宜菊隱秋同淡，紅笑楓濃晚欲然。  
莫怪美人怨遲暮，新霜已上鬢絲邊。

蓬門洗盡舊鉛華，思婦登樓念轉差。  
皎月入懷光有耀，英雲託興正而葩。  
迷離蝶夢芳心碎，浩蕩鷗盟望眼賒。  
吟到白頭無限恨，玉釵敲斷未還家。

淡冶秋容一抹齊，小廊東畔曲欄西。  
欲聯綺紵心應許，莫買胭脂目轉迷。  
畫點粉金緣砌近，字成墨帚傍墻低。  
書生本色春風面，漫作頽顏效滑稽。

朱紫從來不到門，冰心如水共朝昏。  
紅顏已謝恩猶在，皓首爲期道可論。  
露冷難尋銀粟迹，歲寒先借玉梅魂。  
家風儒素存吾舊，多事詩人斲墨痕。

陳含光道兄以詩見贈依韻奉酬

翰墨輸君老斲輪，一篇傳誦有餘辛。  
浮生倏忽如晨夢，明德留貽見達人。  
落葉頓增千古恨，吟梅還作兩

家者南來自愧揚州客懸榻高情總屬陳

### 續秋興八首仍用杜詩原韻

去歲客胸曾有是作今來邗上又感秋深託興成吟載旂前詠賀諸同好敢乞和章

天末涼風又入林夕陽城郭鬱森森花蕃瓊觀空塵迹柳苑虹橋尙晚陰淮南來遷客感燕雲北去望  
鄉心遼陽雁斷無消息愁聽催寒九月砧

短髮蕭疏側帽斜無端絲鬢上霜華虛名莫誤盧生枕絕域曾廻漢使槎成舊何人搜畫舫防秋隨地動  
清笳小園枯樹今搖落日賞孤芳到菊花

平山喬步愛餘暉向晚登高酒力微欲賦蕪城憐鶴化閒尋隋苑賸螢飛玉鉤香豔秋魂斷金帶榮華春  
夢違最喜年豐人意足江田萬頃稻梁肥

傳聞賸擊正圍碁秋氣徒增宋玉悲黑水白山縈舊夢丁歌甲舞記當時翦將鶉首疑天醉攀到龍髯逐  
日馳明月高樓須借問七哀成詠憶陳思

隔江遙見六朝山雲物淒清咫尺間沈鼎北遷通洛水丸泥東出鞏函關星宮屢坼中台座廣廈難歡下  
士顏今代邊功誇墨守奇謀誰繼魯公班

老成休更說龍圖廿一年來戰伐秋蜀碧恨添三峽淚冬青寒鎖六陵愁書生事業餘戎馬諸將勳名盡  
海鷗回首中原戈未息蒼烟九點看齊州

覓句初成一將功百年如在苦吟中龍沙九日曾飛雪海孤雲自避風終古垂楊流水碧經秋殘葉得  
霜紅蕙園草木無知好涉溯興衰問醉翁

江流日夜已東迤瘦盡西湖水落陂紅藥橋低迷斷岸綠楊村近綴疏枝山能入畫仍難買家似浮舟儘  
可移何處洽春詩社在吟秋登眺向南垂

爲包希庵題所藏李梅庵墨蹟卷子

爲包希庵題所藏李梅庵墨蹟卷子

寸楮堪千古梅庵有信徒論文師友契競爽弟兄俱一瓣香猶在雙清德不孤鍾山傳舊學珍重此璠璣

揚州雜詩二十首用杜工部秦州雜詩原韻

十里春風路揚州續舊遊綠楊夢客夢紅葉動鄉愁日落鴉棲晚霜寒鶴唳秋西湖人比瘦一半此句留  
天寧尋古寺勝國舊行宮題句碑仍在藏經閣未空旌旗難蔽日鈴鐸自吟風百感茫茫集江流勢已東

汾溝通北道，浩淼見平沙。稻熟強吳國，鹽饒富漢家。地鄰隋苑近，山界蜀岡斜。根觸蕪城賦，繁華未足誇。  
修禊虹橋事，風流異往時。酒難千日醉，賦有九秋悲。野竹濃陰覆，籬花晚節遲。冶春觴詠地，誰復繼羲之。  
昔日金絲柳，青青幹尙強。繁條枝苦短，壓線葉添長。彩筆驚鸚鵡，輕裘換驢婆。娑生意盡，相對鬢毛蒼。  
西峯縣遠近，晚眺欲忘歸。樹老催黃落，山深冷翠微。豐年愁穀賤，久旱覺苗稀。芍圃無尋處，何來金帶圍。  
積土起康山，重城新舊間。其魚民苦溺，如虎吏當關。燕雁秋來去，舟航日往還。禹功今在否，昏墊轉愁顏。  
傳說唐中葉，倭僧自此回。求書空海去，卓錫大明來。昔極同文盛，今惟互市開。那堪東北望，遼瀋雁聲哀。  
宮館何年圯，樞名尙五亭。雲常連塔白，山是隔江青。魚美三篙水，螢流數點星。長隄待舒柳，春樹滿林坵。  
山脈溯崑崙，沿江灌溉繁。淮清嗟失道，河遠欲尋源。市舶瓜洲渡，湖田甓社村。東南盛財賦，拄杖望京門。  
渺渺雷塘外，寒烟四野低。迷樓無片瓦，遺冢有殘泥。楚客天難問，隋隄日已西。興亡垂帝鑒，休更事征蹊。  
記泛明湖棹，曾尋六一泉。平山今在望，勝蹟古相傳。遠樹秋雲外，危樓香雪邊。歐公遺像在，鬚髮共蒼然。  
多少南朝寺，渾如列戟家。風回看易幟，月出唱量沙。證佛難參果，屯兵屢及瓜。菴修廢觀誰，爲補瓊花。  
漢有江都相，探原道在天。宗風三策振，繁露一書傳。遺躅空祠宇，清流到井泉。觀濤待枚叔，應問曲江邊。  
悽愴梅花嶺，荒祠蔓草間。衣冠已黃土，魂魄尙青山。埋骨知何處，攀髯去未還。傷心十日記，竹淚賸斑斑。

萬壽重寧寺謳歌徧衆羣錦帆曾拂水紺宇欲生雲歲暮梅千樹秋空月二分何人隨八駿野老有遺聞  
前朝尙風雅餘緒逮同光分韻爭題壁藏書儼列堵琳瑯文匯閣灰燼大觀堂瀕洞風塵後方思化日長  
腰纏誇十萬騎鶴幾人歸沙面看風色江頭漾日輝羣鷗自翔集衆鳥漫追飛佇立孤城外新寒漸作威  
尙有題襟館聯吟下筆難論園思竹素徙宅憶桑乾薜壁籠紗少桐陰繞屋寒漁洋今繼起可許築詩壇  
世亂文章賤當時悔不知應慚先入主莫笑倒紉兒黃菊荒三徑朱華冒一池南飛問烏鵲何有可棲枝

初冬湖上

扁舟一葉水無波十月陽春氣尙和到眼青山隨地盡打頭黃葉趁風多湖田清淺鋪芹藻石磴荒寒掩

薜蘿蕭寺鳴鐘天欲晚惜無明月照人過

是日爲  
月聯

侯葆三先生遇於邗上以詩見贈賦此奉酬

匆匆離合亦天緣回溯前塵十七年老去輸君豪氣在詩中稱聖酒中仙

前詩意有未盡再賦一絕並次原韻

敢將聲律校猗那一席傾談奈別何他日尋詩渡江去錫山深處聽樵歌

寄淑卿

曾約看梅在舊京

去冬寄詩  
有此句意

誰知相隔尚昆明  
盈盈恰似銀河水  
不盡長江萬里情

山名萬壽壽而康壽字朱紅徧兩廂  
知有佳兒親獻壽  
年年眉壽共春長

康山遠眺

城郭無今古  
殘山尙姓康  
帆檣來邵伯  
祠宇憶湘鄉

山之西爲湘  
鄉曾文正祠

賸有枯禪寺  
難尋舊草堂

康山草堂舊爲  
康海所居董香

光曾  
題額

琵琶誰嗣響

康海嘗於此  
山彈琵琶

空說董香光

聞雁

征雁驚寒嘹唳哀  
一行斜字碧天開  
南飛應向榆關過  
可有遼陽信使來

傅沅丈寄示秦遊日錄讀竟敬題二絕即以答謝

一卷秦遊太華篇  
九能今許說山川  
西行卻憶童年事  
回首咸陽古渡邊

陪京聞欲續文謬誰續關中勝蹟闕解識輪軒新語意補天西北可論都

### 冬至作

微雲漠漠霧沉沉曉氣侵衣欲溼襟幾日溫和占雪意一陽來復見天心梅花春早香初動桂樹冬榮綠  
尙陰誰把清樽酬節物歸期未定且長吟

### 和友詠史

鼎峙三分蜀魏吳隆中一對語全符名臣言行躬耕業止有桑田八百株 諸葛亮

當年漢壽一亭侯失卻荊州事業休自有協天隆帝號廟堂崇祀獨千秋 關羽

曾向轅門射戟枝英雄末路竟何之銀龜白馬傳遺事似借貂蟬賺太師 呂布

### 對雨

江淮卑溼曉陰陰獨對空齋感不禁虛室晝昏驚日短熏籠春透覺冬深蒼苔積潤餘黃葉丹桂留芳尙

綠林風雨雞鳴君子意與誰同誇歲寒心

### 除夜偶成

消寒圖裏一陽初急景相催歲又除國事酒酣三日醮人情紙薄幾封書曾聞珥筆占雲物誰見麾戈返  
日車欲作來朝賀年語更新氣象果何如

### 元日

年年湖海遠游人頻見興朝景物新正朔已頒周甲子歲時仍紀夏壬申澄清夜氣將催曉煦育冬陽待  
轉春一笑相逢添吉語衿衫難浣舊京塵

### 曉起望雪

憶昨林風掃葉乾朝來一白壓檐端西園幾樹黃如縵止有蠟梅能耐寒  
侵人冷氣透重裘雲海沉沉曉日收松竹向來風骨健雪中偃蹇亦低頭

渡江

浩浩大江聲東流萬里情  
凍雲京口堪晴雪  
石頭城咸事思南渡  
陵寒欲北征  
六朝遺恨在  
擊楫齊難平  
自揚州至鎮江轉浦口登車北歸賦寄邗上諸君子

朝南暮北去來波  
一日櫓江兩度  
過風雪信人寒至此  
雲山別我意如何  
天涯獨往知名少  
白下甯經舊  
感多回首瘦湖忘  
不得長隄春柳已婆娑

車行徐濟間風雪大至卽事有作

風雪催人數驛亭  
勞勞此路幾曾經  
鄒滕壤接初飛白  
齊魯山多不送青  
寄遠有詩誰屬和  
消寒無酒且  
常醒鵲華咫尺  
黃河近只惜征車未肯停

車中望雪

長途風雪催風疾  
雪逾積車行殷  
輪聲過滅軌迹平  
疇已瀉銀安能辨  
阡陌野曠不逢人  
茫茫天一色  
此瑞兆豐年  
連雲宜宿麥  
獨有原上松  
孤標挺寒碧  
南雁杳不來  
榆關斷消息  
沙場沒膠深  
戰骨僵如石

遠行望天涯歲暮車中客明日還舊京應見西山白

### 平浦道中

夢醒朦朧淡月中軒窗徒倚靜無風凍泥枯草寒霜白殘雪疏林曉日紅四省三程輪軌接一年兩度棧車同南來北去終何事也似隨陽戲海鴻

### 苾芻省委春前招飲賦詩奉答並呈同席諸公

山水清風自昔傳開筵今見主人賢獨懷舊迹蟬香館文酒流連廿載前  
風雲河朔萃冠裳並世賢仁共一方民治發皇臻上理稱觥春酒待躋堂

### 舊除夕

星回斗轉正當檣臘盡頻驚歲序添杯底蟻浮餘魯酒車前驥老困吳鹽寒梅有信知春近爆竹無聲覺夜嚴又是陰陽催短景誰將律曆溯黃炎

春日小蟬香館雅集得晤靜如廳長賦呈乞教

東環瀛渤是鄉山得識荊州足慰顏已見無雙求國士莫忘第一失雄關斬鯨遼海誰心許市駿燕臺有骨還聞道始和勤布政熙春敢恨鬢毛斑

平津車上偶成

微陰淡蕩早春天曉起登車意惘然一醉難求千日酒再來不值半文錢詩書誤我惟憎命案牘勞人且結緣行路悠悠家國感敢從雌亂惜衰年

晨鐘

殘夢初回夜氣清寒燈猶是隔宵明誰從風雨雞鳴候靜聽晨鐘到耳聲

倉海以新年之作見示因次末章原韻奉酬

茫茫人海盡飢驅春意昭蘇到九衢幸有一樽傾白墮誰從三輔補黃圖文章末世原無俚風景新亭尙

不殊強作長吟酬節物丁沽月朗見瓊珠

### 春雪

昨宵殘月曉猶明急雪迴風忽地生烟火萬家消疫氣草泥千頃待春耕尋梅無地延韶景詠絮何人愛  
晚晴七十二沽冰欲泮玉壺心迹喜雙清

### 城南詩社會飲賦呈同社諸君子

卅年浪迹暫還鄉喜見詩翁集一堂曾是梁園舊賓客樽前感事憶嚴光  
城南小飲正初春酬唱當筵孰主賓風景不殊詩興在那堪滄海又揚塵

### 同社諸老賦詩懽迎並爲預祝愧不敢承疊韻答謝

結社聯吟析木鄉諸君許我亦升堂年來舊學消沉甚誰爲神州煥國光  
虛負韶華六十春宜年福祿頌嘉賓一樽聊借論文酒還祝長生附後塵

中和節讌集

夏時二月二舊節稱中和津沽水欲泮東風揚素波城南衆賓集對酒還當歌新詩張滿壁飲罷資吟哦  
邊寒苦征戍魯陽方歷戈農書盡陳迹東作嗟蹉跎吾輩已衰朽望魯無斧柯徒作傷時語國難將如何  
歸來不成寐覓句憂思多安得中山酒一醉蒼顏酡

城南社集分韻得珠字

詩海探驪已得珠年來韻事說丁沽城南也似蘭亭集修禊誰傳王客圖

賀吳孚威六十壽

蓬萊閣下是仙鄉六秩開筵快舉觴洛社耆英尊潞國洞庭廣樂憶衡陽壯懷歷日紆忠憤正氣凌霄應  
壽昌北海南山齊獻頌宜年福祿共春長

暮春朔日城南社集分韻得城字

老去傷春醉不成，花無聊賴酒無情。  
珠槃泛海猶通使，鐵鎖橫江未解兵。  
競說人心思故漢，徒聞天險限  
長城。新亭名士空流涕，可有悲歌出塞聲。

### 游頤和園

郭門西去好車行，一道輪聲輦路平。  
村水煖添桃漲活，野風微颭麴塵輕。  
草萌淺碧低難辨，柳茁新黃嫩  
未成。萬壽山頭試登眺，湖光潑灑是昆明。

徧覽名園寄慨多，當年孝養說頤和。  
尙留臺沼娛佳日，不見樓船泛夕波。  
石舫人空飛石燕，銅亭春冷臥  
銅駝。佛香閣下排雲殿，回首游仙一剎那。

橋影環湖一鑑開，長隄隔岸見樓臺。  
微雲可許成甘澍，細雨偏能掃薄埃。  
草木何知亡國恨，江山只爲昔  
人哀。無情最是宮前水，淘盡繁華又幾回。

五雲宮闕在人間，誰道高寒不可攀。  
且喜登臨腰脚健，莫傷憔悴鬢毛斑。  
長廊拄杖尋詩去，近岸迴舟載  
月還。孤塔風鈴似相語，何時更訪玉泉山。

曉行口占

峭寒如水靜無聲  
兩兩三三破曉行  
萬籟消沉人未覺  
此時夜氣最清明

賀寧河齊公壽

五秩欣開介壽筵  
將星高拱海雲邊  
花榮九十春常駐  
桃熟三千月正圓  
諭蜀文留司馬檄  
過江人憶謝安年  
鳳毛燕翼今馳譽  
蘭玉森階喜象賢

挽王緯齋先生 武祿

入社聯吟愧我遲  
我來正值哭君時  
窮愁到死君休憾  
一笑凌雲看挽詩

題許琴伯畫佛

如來如是誦金剛  
供養因緣徧十方  
歡喜慈悲同讚歎  
諸天花雨禮空王

蘇星橋先生詩存三百首題詞

難得高情孺子徐選詩珍重費工夫

此集爲先生及門徐君鏡波選刊

新編僮署東坡集定許逢人說大蘇

磬徹鈴圓絕妙辭果然得失寸心知篇終觸我鴿原感未忍重吟落葉詩

集中有和先兄落生落葉詩四首原韻

文探陰騭託吟章述德詒謀未敢忘最是先生題句好流傳到處有慈航

我曾校刊先祖陰騭文律詩先生題詞有我願廣流傳視作慈航漫之句今載

此集中

一門沈瀝有誰儔師弟聯吟自唱酬

鏡波近有五十述懷之作先生依韻和之

珍本刊成三百首藏書應築仰蘇樓

城南社集分韻得處字

三月春未殘留春春欲去丁沽魚止肥餘寒勒花絮誰爲弄扁舟中流任容與不見武陵人桃源渺何處  
張芎暉社兄爲其十一叔母徐宜人撰述事略徵集題詠謹成四絕用志欽仰  
兼慰仁波世丈悼懷卽乞正之

詩書遺澤舊家風鍾郝稱賢禮法崇教子相夫垂盡範不因吟詠廢容功

唱和閨中德不孤承家小阮亦門徒舊留題處傳佳話補入西園雅集圖  
烽火榆關戰骨寒佳城鬱鬱一身安千秋文藻清微閣詩卷長留石不刊  
莫將周甲惜華年成佛升天定有緣寄語黃門休痛悼繩牀經卷試參禪

徐鏡波道兄以五十述懷之作見示勉成一律藉當崧祝

述懷十首誦新詩喜見筵開五秩時會計錄成周委吏文章望重漢經師耕漁共羨傳家舊塵風何嫌得  
子遲百歲光陰今正半祝君平步到期頤

也園曉步

近依河澚遠環城是處園林也有情止水一泓堪飲馬春風三月不聞鶯新棠幾見留餘蔭幽草還期待  
晚晴料得勞人宵未寐疏燈隔徑電光明

此珮社長招飲厲齋同賞梨花海棠分韻得欺字

三月春寒酒不辭自慚雙鬢已成絲閒來分韻題新句老去看花惜故枝滿樹棠梨堪寫照驚人風雨莫

相欺眼前烟景仍如舊卻憶高賢拄杖時

### 挽林墨青姻丈

卅年舊感懷元亮

陶仲明  
姻丈

五載餘哀弔子陵

嚴範  
老

凋謝到公三老盡片心空抱玉壺冰

共仰靈光奉典型早馳文譽晚窮經他年廣智開新館定有岑樓謚墨青

### 也園即興二首

嫣紅淡白鬪芳華葉葉枝枝映日斜看到海棠開正好春風卻憶故園花

從來止水最空明磬石環池小築成一樣泉流通地脈如何不似在山清

芹香姊丈約飲厲齋院有白海棠兩株著花甚繁席罷賦詩二首藉志盛會

初夜張燈數酒罇海棠深院月如鉤年年盡向花間醉幾見詩人未白頭

兩株晴雪壓高枝幸有衣塵未化緇莫遣東風送春去賞花常是半開時

### 平津道中

曉涼如水氣如秋城郭微茫月半鉤淺水無波看浴鴨平蕪初日見耕牛窮邊未息亥黃戰久客真成汗

漫游渺渺海濱說吾土前程還似仲宣樓

感事

滄海橫流事可傷  
沐猴空說楚能強  
薰蕕並世功名賤  
離亂催人嫁娶忙  
幾輩有家愁轉徙  
廿年隨地見流亡  
朔方特表同文治  
濟濟宏開選佛場

陳後莊六十壽

詩友城南社  
觥觥數太邱  
神山曾共硯  
學海屢同舟  
桑梓論恭啟  
葭莩結侶儔  
五陵舊年少  
甲子已平頭  
屈指天中節  
筵開六秩時  
康寧攸好德  
文學大宗師  
桃李新陰徧  
芝蘭後福宜  
蒲觴將進酒  
相與祝期頤  
廉雅希以其配  
王夫人傳寄示  
因題兩絕以志淑行兼慰悼懷

瑯琊門望夙稱賢  
中饋親持廿八年  
教子相夫堪範俗  
德音宜著女師篇

異香滿室忽沉冥  
垂老安仁涕淚零  
試訪西山尋片石  
深深鬱鬱自題銘

爲王廷鈞題其先德行樂圖

昊天罔極念深恩，應恨雞豚未逮存。此是丁蘭親刻木，百年孺慕奉晨昏。

秋興八首三用杜韻

居然城市有山林，秋入芳園萬象森。水匯百沽連巨浸，海通三島鬱重陰。浮名何補詞人命，暮景難灰烈士心。說到故鄉仍是客，商聲先送搗衣砧。

東北天傾地軸斜，台星猶自耀中華。南宮競載趨朝寶，西極將迴上漢槎。杼柚已空愁轉粟，干戈未定厭聞笳。斬鯨遼海何年事，誰更凌風拂劍花。

海東晴旭正暉暉，欲障狂瀾愧力微。一任潛虬分水立，更看退鷁挾風飛。補天鍊石功誰屬，返日麾戈志已違。榆塞秋高休挹爽，臨邊胡馬又將肥。

廿二年中一局棋，神州莽莽盡堪悲。黃流已近沉災日，赤燄無忘厝火時。半壁河山終破碎，九秋風雨條飛馳。濯纓若問滄浪水，清濁分明可再思。

久移家計近西山，幾度秋風太液間。敢有文章驚海內，惜無詞賦動江關。丹砂枉貯籠中物，白髮頻添鏡

裏顏回憶五陵舊年少當時車笠感同班

江南風景忍回頭十載羈縲白下秋有客登樓能作賦何人送酒強澆愁倦宜息影依巢燕老漸忘機狎野鷗重話虹橋修禊事冶春殘夢繞揚州

誰築詩壇待有功城南興盡一春中乘潮歸趁丁沽水步月歌成子夜風衰鬢應漸疏柳綠笑顏常對好花紅莫嫌秋氣多蕭瑟健筆相期百歲翁

九河新漲勢逶迤細壤如塵灑路陂佇望停雲思北道預邀明月問南枝秋隨楚客詞中至情待成連海上移鴻雁不來書莫寄倚樓吟處畫簾垂

### 水西莊宴集分韻得成字

水西莊外唱行行近挹河流遠隔城百代光陰真過客二分煙月賸秋聲似聞東壁徵題詠誰向南冠記姓名思古幽情今繼起可能新築早觀成

### 庸齋廳長以生日近作寄示次韻奉和

與君盧李溯交親貽我琳瑯筆有神生日恰宜新歲酒并州已作故鄉人詞傳汾水應同調宴集梁園盡

上賓猶有歎吟枚叟在梅花清寂自書春

河朔分官記昔年從公深喜大夫賢九疇錫福徵神禹三絕成名說鄭虔鬱鬱寒松恆岳雪迢迢春樹蘄  
門烟舊京回首懷前事守歲叨陪介壽筵

### 立春後一日平津道中作

長曆如環歲序新平津往復作遊人民時到眼仍行夏節氣從頭又立春冉冉光陰添鬢雪勞勞蹤迹逐  
車塵試燈風裏重來約屈指元宵正浹辰

粹廬詩鈔

# 粹廬詩鈔卷二

天津劉潛芸生甫著

## 元日感賦

星輝雲爛啓天閭，五色旗開日月光。  
治曆尙遵周正朔，論都重見漢文章。  
欣從河北聯鷄序，卻憶江南整雁行。  
記否蕪亭餘麥飯，幾番循省對朝陽。

## 題帚廬主人幽憂集

驚風倏起滯河南，墜溷飄茵最不堪。  
合掌達摩惟面壁，低眉彌勒竟同龕。  
書空有恨心原坦，斫地無愁夢亦甘。  
贏得幽憂詩一卷，忍尋枯樹賦江潭。

## 歲朝有寄

旭日瞳瞳映曉烟，馬龍車水朔風前。  
迎春待進延齡酒，憶昨曾陪餞歲筵。  
塵世是非皆夢幻，人生離合亦

天緣弓弦東指朝陽道  
忍溯遊蹤說去年

### 廣濟寺建醮

七日清齋建道場  
愁雲黯淡翳朝陽  
孤城浩劫紅羊慘  
華表歸魂白鶴翔  
上界超昇依淨土  
中宵禍變起蕭牆  
潞河不盡滔滔去  
此恨難淘逝水長

### 殷亦農長官五十壽

百年上壽祝生申  
如日中天正五旬  
吳越舊疆留樂土  
彭聃新紀頌宜人  
試燈節近催元夜  
養酒香清釀早春  
世事浮雲多變幻  
前塵休問潞河濱  
去歲茲晨敞玉筵  
鳳城春色又弓弦  
滄桑西海成陳迹  
絲竹東山際盛年  
梅訊喜傳人日後  
松貞常秀嶺雲巔  
九如天保歌耆艾  
願見燈宵月再圓

### 春丁將事有作

更鼓宵嚴漸轉寅  
宮牆列炬與時新  
園橋露重將開曉  
瓊島陰濃欲釀春  
紅燭難邀滄海日  
青袍未浣舊

京塵朝珠百八猶能記三十年前執戟人

### 春日與諸同學稷園讌集

春風送煖日遲遲共酌名園午不知話舊莫忘離亂世惜芳難得豔陽時忍看劫後花三徑且醉尊前酒  
一卮佳氣葱蘢宮闕近故都喬木耐尋思

### 廉雅希以家存祖遺補服徵題爲一絕

祖德留貽此一端雲章黼黻得來難烟消御案香應在想見威儀重漢官

### 題金粟如來記爲周芝叟作

金粟如來是後身還將後果證前因鍾祥試溯初生地紫竹林中早降神  
離恨天難問苑枯人間緣分本須臾暫從鳳去臺空後補入蟾宮折桂圖  
青鸞白鶴看翺翔五夜祥光霽畫堂親見燕城廻浩劫觀音山下有仙鄉

誰云生滅渺無憑悟到禪宗最上乘蓮座皈依留後福縣縣翼翼速孫曾

孫摯哉以結婚念年紀念照片屬題

回溯前題又十年鏡中人尙未華顛流霞一醉顏常駐比翼于飛不羨仙  
結褵廿載說齊眉白首相偕百歲期佳話累增新紀算他年容我再題詩

和鳳九移居之作卽次其韻

人事勞勞莫問年嚶鳴求友喜新遷回翔郎署容吾輩輔翼戎樞景昔賢  
雙塔外窗含晴雪萬峯巔細旂廣廈慚居處  
用臺蘇州自慚居處  
崇未瞻新民康意 佇盼郊圻靖戍烟  
部翼覆爲參謀本部有  
徐東海戎樞輔翼題額 幔卷朝暉

田仲韜持示四十八歲初度之作徧徵和章次韻奉壽

斗轉星回歲欲闌喜將延壽祝平安青陽入律迎年早白雪賡歌屬和難  
碁局幾經朝籍改酒樽惟覺故情歡凌寒嶺上孤松秀卿月當頭且暢觀

元日賦呈諸君子

廿八開年慶履端一元復始萬方歡  
璣衡曆數尊周正劍佩儀重漢  
官松柏綵迎朝氣爽葡萄香溢夜  
光寒相逢共祝康彊福肇歲無忘國步難

仲冬旬有五 日六十五歲初度口占敬答知好

卯糧寅食歲華鮮

今日尙屬戊寅年在國曆已爲己卯歲矣

六五占爻說大年拂而緇塵衣未浣當頭皓月鏡同圓梅香且喜春

初動竹節還期老益堅滿目瘡痍休論壽聊將樽酒介賓筵

日本山口大佐 松風 以詩留別即席奉和

寒夜張燈餞別時當筵歡笑讀君辭  
長風萬里歸帆去應憶燕都上將旗

喜雪二首用東坡尖叉韻

昨宵曾見月纖纖飛雪漫空夜氣嚴  
破曉漸侵雲母幌凝寒徧灑水精鹽  
凍痕深淺連幽砌冷意迷茫接

短檐更上層樓看白塔五城高處聳孤尖

平林冷峭不飛鴉滑滑新泥共轉車可有閒情吟柳絮欲探春信問梅花圍爐話舊高人宅賭酒消寒處  
士家記取髣蘇詩句好還期和韻到劉叉

夏曆己卯歲朝有作

斗柄回寅麗日華六街紛逐轉輕車名程強附隨陽雁時序真成赴壑蛇薦歲香風添柏葉迎春晴雪點  
梅花誰將爆竹開新紀驚起金臺百萬家

和寧河部長元旦書懷元韻

日出寅賓換卯年神京猶是舊山川家傳兵法魯姜尙國重戎樞待計然綺麗歲華成老大澄清志概策  
安全陽春一曲增朝氣黍谷回溫欲補天

人日讌集寓齋賦呈諸君子乞正疊前華字韻

良宵小飲數年華門外新停長者車室有爐烟驚幕燕壁無弓影誤杯蛇春風深煖宜看竹人日題詩定

詠花市遠多慚清酒薄一樽相對似山家

### 伯言秘書招飲即席賦贈仍疊華字韻

傍晚微陰掩月華春城西畔共停車詩囊競吐三珠鳳酒陣誰排一字蛇菜甲新添佳客饌椒盤猶頌歲  
朝花孫陽列坐增吟興應識騷壇有作家

### 山口信一佐倉寄懷次韻卻寄

拂面春風歲序更海天東望客心驚上元燈火思君夜三五清光月正盈

### 上元即事四疊華字韻

上元燈火滿京華不夜城開月轉車逝電流光看走馬奔雷啓蟄欲驚蛇青簾色映瀛洲草紅袖香添禁  
藥花人海駢闐喧鬧市更誰豐歉問農家

### 伯川將軍招飲頤園紀事 五疊華字韻

昨夕春燈絢九華頤園今晚駐軒車詩懷逸宕宜歌雅酒令分明記畫蛇餘事莫言溫室樹閒情應憶故

園花更新秩序開東亞中日聯懽是一家

高伯言廳長之任保陽詩以送之

禹貢論形勝分疆首冀州山川憑建節風雨感同舟棠舍君重憩蓮池我舊游移官非所願布政喜優優  
昔日論文地春風惜別天鄉邦殘破後民治亂離前舊雨三津水清流一畝泉抱陽山近遠佇聽頌聲傳

和陳牧青年兄新年偶成原韻

寒消黍谷早回春劫後風光又轉新鋒鏑餘生猶賀歲詩書舊澤慣安貧隔年梅信曾吟雪何處桃源可  
問津旭日東升旗五色熙熙同作太平人

高伯言廳長有留別之作疊韻奉和

甘棠詠南國舊績溯江州

君昔觀祭澤陽權關九江

早歲曾投筆宏材已作舟九能崇上選三輔憶前游今日膺新命

從知仕學優

節樓共晨夕相別早春天  
酬簡梅風裏近來時離樽杏雨前  
深情問潭水清德比廉泉  
省識臨歧意新詩  
日下傳

### 題黃公渚翊厂詞

曉風殘月柳屯田欲播商音被管絃  
讀罷新詞春正好杏花時節雨如烟  
入海浮沉寄此身天涯同是倦遊人  
曲中知有登樓感二月櫻花島上春

### 和許琴伯桃源原韻

朝市遷移不是秦桃源何處訪遺民  
迷津漫問神仙侶癡絕天台再到人

### 燕京八詠

#### 瓊島春陰

瓊華島上試登臨漠漠春城鐘日陰  
流水一泓通地脈養花三月見天心  
烟籠燕市陽和早雲近龍池雨

露深白塔凌空高不極願依霄漢待爲霖

太液秋風

液池秋早動西風  
— 西風三海周環南北中  
疏柳漸搖宵月白  
晚荷猶颺夕陽紅  
半篙殘漲文波起  
一味新涼爽氣通  
錦樣年華洵逝水  
更誰題葉御溝東

西山晴雪

朝來登眺望西山  
積雪初晴掩映間  
拳石聳青成皓首  
眉峯埽翠失蒼顏  
天光遠襯浮雲淡  
霞彩平分落日殷  
欲問高寒何處是  
瓊樓玉宇盡仙寰

薊門烟樹

河朔山川拱薊門  
淡烟叢樹鬱黃昏  
行行涼蔭斜通道  
戶戶晨炊近有村  
驛路西來連暮靄  
神京東望翳朝曦  
金源舊蹟無尋處  
佳氣葱蘢尙九關

盧溝曉月

曉月迎人春復秋  
年年相送渡盧溝  
孤城曙色開殘夜  
一道波光挾濁流  
朝氣清明消馬足  
浮生醒睡數獅頭  
河邊戰骨深閨夢  
照盡茫茫萬古愁

居庸疊翠

邊城西北鞏居庸翠繞雄關疊萬重霧隱層巒迷去雁雲垂孤嶂起潛龍蒼烟絕頂雙輪破赤日當頭半壁封峽底鳴琴流不斷看他飛度最高峯

玉泉垂虹

趵突琤琮漱玉泉彩虹垂處接諸天高甌直迸銀河瀉匹練常隨石磴懸吸向長鯨紅樹外奔來渴驥碧峰巔涓涓一勺源頭水徧漑西郊萬頃田

金臺夕照

當日黃金別築臺夕暉殘照尙徘徊射鳥難返陽侯景市駿空傳郭隗才萬柳蕭疏秋氣肅九門駘蕩晚晴開寺樓零落疊宮閉

謂夕曛寺及金臺書院

易水寒風幾遡洄

喜雨六疊華字韻

宵來一雨浥清華霽霽郊原祝滿車殘月沈天迷雁鷺輕雷動地起龍蛇池塘水漫應生草庭院塵消更潤花入市莫嫌泥滑滑春耕最喜是田家

己卯季春上戊祀事禮成敬賦 七疊華字韻

鷹揚勳業冠中華  
渭水投竿載後車  
兵法六韜留虎豹  
靈旗五夜動龍蛇  
黎明辨色衣迷草  
芬苾升香燭  
結花武德無慚傳  
萬古春祠宜配魯東家

畿輔先哲祠春讌感舊有作 八疊華字韻

春祠禮罷賞芳華  
又向斜街暫駐車  
泥認巢痕來客燕  
風搖柳影閃秋蛇  
荒池猶疊嶙峋石  
深院初開顰  
郁花正是豔陽烟  
景好棠梨依舊幾人家

撫帥總長五旬晉五雙壽賦詩奉祝即用元旦書懷詩韻

笳鼓聲中祝大年  
九如歌詠到山川  
三三麗景桃先熟  
五五恒春花欲然  
戎服談經文並茂  
斑衣舞綵福兼全  
金臺月滿欣開宴  
獻頌無才愧揆天

得勵餘書卻寄

昨日書來自岳陽郵程歷數隔三湘永豐村鉅荷塘路可是山城水驛旁  
金臺一別兩經春往事難忘灑水濱江漢滔滔流不盡幾時重作壯游人

### 什刹海會賢堂讌集有作

朋酒招邀說會賢荷風香送晚晴天曾遊白下三千里回溯清時十五年離合塵蹤等萍水浮沉世事感  
桑田歸來莫作江南憶且醉王城人海邊

### 題周劍新結婚合照

儷影雙雙鏡裏留天然福慧幾生修同心自結神仙侶偕老相期到白頭

### 高澤畬總理七十壽

梓鄉山斗仰耆英再造元功晚歲成周召共和開相業劉樊偕老得仙名  
並榮節過中秋看月滿極嬾雙照壽星明

齊少撫中校挽詞

誕降曾聞寄豫章，垂髫初見蔣山旁。誰知一覺遊仙夢，卻在昆湖雲水鄉。

本來家學有淵源，虎子騰驤出將門。最痛彌留無別語，歎歎執手念親恩。

三年病榻壯心灰，日日元戎小隊來。葉落空園秋月冷，西風淒絕望思臺。

廻廊行盡轉逡巡，驚歎衣衾已附身。

余聞君歿亟往  
趨視已小斂矣

玉樹忽摧揮老淚，燈前誰慰白頭人。

謂君之外祖  
舒綬晉先生

學探歐亞歷寰瀛，虛負乘風萬里行。四海親知同下淚，愁聽薤露挽歌聲。

休將噩夢誇瓊瑰，死別吞聲儘可哀。想見平生師友契，尼山有慟泣顏回。

君歿之日，親知無不悼惜君  
之師松浦莊三先生尤慟

百鍊精金遡石頑，忌才難破老天慳。中宵觸我西河痛，舊感茫茫北極山。

兒子騫年歿於南  
京，葬北極閣山下

玉樓赴召自升天，佛說輪廻豈渺然。桑下探環羊叔子，可能留得再生緣。

王伯川將軍六十壽

二首  
徵年百戰身，壽先五福際。良辰十洲覽，勝探三島萬戶歌。功徧七閩榮，鞠將開重九。節莊椿常蔭，八

千春寶筵四座延齡酒一瓊瓊漿祝六旬

初冬喜雪 九疊華字韻

十月初冬菊尚華宵來飛雪忽盈車樓陰鬢鬢天垂象轍迹蜿蜒地畫蛇誰飲夜光酣竹葉早分春色寫  
梨花高寒瓊島仙居近喜溢長安百萬家

孚威上將軍挽詞

海右蓬萊境山川挺異人三三陽九運六六大千身雁斷衡陽浦應揚洛水濱將軍容揖客曾奉屬車塵  
隴蜀歸來後柝遲賦道周春秋魯尼父忠義漢亭侯別恨成千古哀思動九州拈花應一笑青史大名留

歲朝試筆

太初舊曆紀庚辰月正逢寅日得辛佳節尚循前代臘和風先送隔年春六街凍解留殘雪萬戶晴開鷗  
軟塵九九消寒眞一瞬鳳城今又歲華新

和寧河部長庚辰元旦步原韻

誰向東風賦早春，戎高詠句清新曲。麈白雪酬佳節，律轉青陽待鸞晨。軍府華燈頌椒柏，詞壇健筆挺松筠。迎年處處傳芳訊，羯鼓催花定有人。

人日讌集

龍躡璇歲日逢人，列席張筵雅興新。銀炬漸催燕市晚，玉壺猶貯潞河春。聯歡好趁迎年候，留醉還期獻壽辰。自是羣東風誼重，一團和氣集寅賓。

殷亦農長官五十二壽

壽永同山岳，宏規肇冀東。保釐周錫命，復霸晉和戎。鷗翼方天半，鰲頭正日中。一池吹水皺，依舊被春風。終野原多暇，壺觴集故知。發棠猶轉粟，看竹待成枝。桑落消寒酒，堦花獻歲詩。潞河燈火後，重見月圓時。

陳牧青年兄以詩見貽依韻奉答

黍谷山樵自在身，詩筒遙寄九城闈。南檐日煖先開子，北斗星回尚拱辰。桃換舊符傳鬱壘，竹譜新律憶

伶倫臨風裁誦迎春句強和元音步後塵

### 王度公局長招飲賦此奉酬並簡同席諸君子

朋酒叨陪筮盍簪登龍何幸託苔岑老成未敢儕梁灑虛譽還羞擬華歆開戶迎風春正早飛觴醉月夜  
初沉當筵莫作疑年問齒錄端從坐次尋

### 殷亦農長官行將東渡詩以送之

莫向當筵發浩歌將離無奈別愁何櫻花送煖開江戶棠蔭流甘記潞河異國莼鱸知味永他鄉梅鶴覺  
情多瀛洲此去風光好海上春回正息波

### 送別

曉月盧溝夢未醒年年迎送短長亭東風又綠燕臺柳閱盡行人眼不青

### 送寧河部長之金陵

中原板蕩幾經春欲挽狂瀾要有人萬里圖南鵬翮健自慚衰朽望車塵

江南春早石城陰此去應多感舊吟  
虎踞龍蟠風景地河山舉目莫登臨

撫公節帥歸自南京喜賦

行空天馬御風回河朔山川入眼來  
留取江南花事好載將春信到燕臺

撫帥督辦總司令五十六壽

海上仙山度索桃壽星輝映將星高  
戎樞輔翼持雙節家學淵源富六韜  
金帶殿春開芍藥羽觴邀月醉  
葡萄年年喜晉長生頌待勒燕然振彩毫

方少峯署長屬題漁樂圖卷子

一幅烟波問釣徒扁舟滿地認江湖  
桃源莫怪漁家傲如此村居世已無  
浮家泛宅足平生展世風波了不驚  
儻我置身圖畫裏與君同有羨魚情

共和庚辰莫春甲午秋榜同年讌集中央公園來今雨軒叨陪客右爰紀以詩

同詠霓裳記大羅當年韻事說登科  
桂宮秋馥聯棠棣花徑春開入薜蘿  
文雅縱談忘晝永亂離親歷盼

時和重逢舊雨來今雨應比醇醪意味多

### 曉過液池觀荷

雨過紅蕖風送香曉陰低壓徧方塘誰將太液芙蓉賦空水無人花自芳

### 立秋日曉起作

清夢初回曉簟柔擁衾推枕數更籌消殘餘熱風偏峭釀出新涼雨未收百歲跼蹉難補壽一年容易又驚秋人生如寄皆駒隙暑往寒來歷幾周

### 王伯川將軍挽詩

浩劫滄桑後京華識哲人戎樞資輔弼武庫裕經綸夙學窮三島餘威震八閩重披書畫傳麾扇欲沾巾  
幾日逢休沐相看判死生膏肓留病榻動績寫銘旌周甲徵耆壽同寅失老成九原應有恨未及見承平

### 鳳九秘書東游詩以送之

瓊島西風朔氣清，送君東去共登瀛。舟浮黃海同時濟，屏列青山到處迎。萬里鯨波看日出，九秋鵬翮奮雲程。歸裝定有新詩料，日喜隨緣作頌聲。

得鳳九途中書並附和章疊韻卻寄

海上秋高月露清，知君今已到蓬瀛。他鄉風景因時異，遠道塵蹤有客迎。借鑑應難忘故國，同舟還欲計歸程。舊游歷歷思江戶，猶憶新橋倚笛聲。

撫公節帥東行詩以送之

上將旌旗出冀州，雲程萬里海天游。白山黑水增新感，員嶠方壺溯舊游。故國有人勞借箸，嘉賓隨地喜同舟。永津固問俗往蕭蕭紅葉西風裏，淨埽征塵與目謀。

伯秋局長隨節出關賦此贈行

元戎東去建牙旗，參佐相隨左右宜。五色星冠新氣象，遼西人識漢官儀。

朔風拂拂度榆關霜滿征衣月照顏城郭人民無恙否停車應問舊家山

冬夜與松浦鳳九班侯孟揚伯午岫青摯哉潛齋冬生慶義意然諸君市樓小

飲

墨蝶林中清酒香中賓盡屬秘書郎每懷勝境談三島最喜良朋集一堂未至相如猶病渴耽吟阮籍未  
嫌狂春生滿座添和氣忘卻寒侵冬夜長

陳鳳九以其夫人所作花卉卷子屬題

織錦才華詠絮人卷頭芬郁見精神髻年已擅生花筆萬紫千紅不老春  
郎君蓬島整歸裝瑤草琪花貯滿囊付與蘭閨供寫照待翻新本譜羣芳

和吳夔厂六十自壽原韻

六十年華尙黑頭欣看鵬翼奮高秋詩能怡性應徵壽酒到微醒可掃愁九府宏規資借箸三山神話說  
添籌春暉寸草成追憶忍拂征衣溯壯游

祝釐誰晉萬年卮清節爲秋品格宜慈竹蔭留春去後幽蘭香挹晚來時策携扶老還行健篋有高文足起衰君念劬勞吟陟屺九如未敢獻周詩

撫帥還京郊迎敬賦

元戎小隊唱刀鐙歸自瀛洲三島間吹律漸增新歲月迴車待整舊江山前游應有留題在後福欣聞載譽還多少健兒期奮武佇聽明訓列鸞班

長至日讌集和止齋原韻

佳日良朋聚一堂吹葭六琯律調陽竹林雅集疇人雀蓮幕和羹博士羊同志斷金占麗澤高吟夏玉出崑岡歲華瞬息更新候益壽延年共此觴

元日偶成

共和三十紀華年瑞日曛曛麗曉天道教儒風宗武聖

是日治安總署舉行國拜先詣武成王神位前行禮

夏時周正溯文宣願摧銅

馬銷兵氣喜見金蛇肇歲躔又是更新瞻萬象可能流澤徧埃垓

### 祀竈日戲作

人間烟火久親嘗一夕乘雲覩玉皇酒進東厨司命醉恐無真語奏天間  
萬家香燭歲將闌髣髴神靈早降壇不是人人爭媚竈黃羊誰薦五辛盤

### 除夕

老去頻驚四序馳辭年又值夜寒時清閒仍喜安眠早拜跪微嫌起立遲  
竹葉難尋千日酒梅花先發萬年枝太平有象傲天幸歲歲常吟守歲詩

### 元夕

鼇山舊事說皇居回首春明憶夢餘雪意消從中酒後月華圓到上燈初  
香車寶馬人應少火樹銀花歲不如老眼相看雲霧裏羣兒嬉鬧在階除

甲午秋榜同年夏日稷園上林春讌集

病起渾如再世人開筵欣接上林春  
看花莫惜韶光晚揀樹常逢夏景新  
異代科名存碩果盛年文讌感  
前塵芝蘭後起今多秀列坐相陪孰主賓

七夕

牛女年年一渡河猶嫌會少別離多  
神仙經歲能相見勝似人生長恨歌

亦農長官將赴東京臨別招飲賦此奉酬

涼風天末柱初秋又向蓬山作壯游  
魚水聯懽徵故劍鴻泥留跡託行舟  
離情莫盡當筵醉國事還期借  
箸等共盼重陽歸棹近安排菊酒話瀛洲

山崎先生七十壽撰詩爲祝即步自述元韻

斗山重望古稀年富士峯高繞瑞烟十萬圖書開廣廈嫺嬛福地媿前賢  
醫宗金鑑本家傳七十行藏順自然君子長生天不老年年春滿杏林前

### 杜鴻賓署長六十壽

天教明月伴長庚六秩開筵酌兕觥壯歲修名瀛海闊中年勛績漢江清戟門春早松常茂幕府秋高桂  
並榮老尚據鞍稱矍鑠燕臺佇見武功成

### 藏園老人七十壽

紅塵燕市一園藏天眷耆英蔚國光五嶽倦遊閒笠屐百城坐擁富琳瑯亞東文化賓師席河朔羣才弟  
子行當日翰軒欣接軫

老人在直隸學使潛以部曹視學職  
旬逾潛司教龍沙值老人出長教部

頻年杖屨喜升堂雅言幸附芻蕘採寶翰承楮

墨香成里葭莖聯季女

息女暨年與老人姪  
女皆適徐氏爲妯娌

公門桃李憶元方

先兄寶廉舉宣統己酉  
優貢實出老人門下

二難森列雙珠樹七秩

歡騰九月觴眉壽萬千齊進酒黃花歲歲醉重陽

### 液池晚眺

太液秋深落日冥塔尖猶見遠山青波光圓滄天邊月燈影平添水上星三海名聞嗟代謝百年喬木成  
飄零暮烟昏黑長安市卅載紅塵夢未醒

### 市樓夜飲柬彬甫

涼宵燈火正深秋同醉新豐舊酒樓省識潯陽江上意琵琶一曲動江州

### 病中吟四首

辛巳初冬胃血復劇幾將不起因作自挽詩四章逾月病瘥乃改題爲病中吟錄之以存其實

老夫已近古稀年無病無舊健似僂詎料膏肓藏二豎竟同蠶蠹厄三眠

入醫院後出血  
三次勢極危殆

澆胸墨塊都凝

血嘔血數升皆  
作黝色塊形刺股鍼砭帶坐氈

日夜注射  
十數回

縱說海邦醫術好此身牛死總由天

幾日頑軀瘦骨枯臥牀未死忍須臾飲冰嚙口消渣滓絕食飢腸轉輓轡

入院七日脛絕  
飲食日惟飲冰

翦紙招魂原幻

杏擘經薦福更虛誣先生報道今歸也問有良朋酌酒無

病中曾擬自挽一聯云七十年長處世間無德無才可稱作  
癡頑老子二三日將歸地下而今而後幸免爲名教罪人

從來生命重連城條與鴻毛等量輕自選斂衣裁祭服

命家人以民初  
所定祭服爲斂

獨題舊秩寫明旌

自擬題棺十八字文  
曰中華民國原任黑

龍江教育廳廳長劉君之札

預書遺囑傳兒輩

口述遺囑命學珉錄存以示兒輩

別訂喪儀待友聲拋卻朝雲自西去東坡九死未忘情

遺骸欲上幾沉吟

擬統遺骸上呈寧河以屬塚未成不果

知遇難酬淚滿襟

夙受寧河知遇恐難爲報思之淚下

五十年來慚腐鼠萬千劫後化

冤禽魂歸莫怨家山遠死去誰探地獄深三聖菴中遺榭在老妻相伴證同心

時亡室陳恭人停柩三聖菴未葬

## 病瘥口占

六日能甦幸更生家人相見喜還驚泉臺已近仍回步想是閻羅未註名

人間去住總勞勞生氣猶存意自豪病久轉愁醫藥貴債臺百級又增高

## 病中見月

自斷此生休閒天何期殘喘尙能延但愁病榻人無寐卻喜虛窗月又圓四大色空皆是幻一身形影敢求全婦娥觀我應相笑今後偷光得幾年

## 雪

節過大雪雪初飛六出紛紛歷四圍室煖不知爐火燼窗明惟見樹枝肥消寒莫羨羊羔酒耐冷誰披鶴

弊衣欲向梅花問消息病中高臥故人稀

冬至後三日對雪疊前韻

冬至陽生雪又飛茫茫一色白成圍著花未覺寒梅瘦入樹還疑老幹肥鴻爪有時留指印鶴翎隨處惜  
毛衣六街燈火黃皆早滿路輕泥車馬稀

亡室陳恭人生日追奠

今日何心問去年回思往事倍淒然忍循俗例稱陰壽空盼重生作散仙一線添長難續命  
六珈偕老枉修緣最憐肴核紛陳處可有芳馨到九泉

恭人生日每在  
長至節前後

病夜不寐

幾回欹枕數更籌靜夜無眠強欲休老病敢言憂國事茫茫百感上心頭

共和三十一年元旦適爲六十八初度詩以紀之

生朝難得正元辰，簌簌風光又轉新。獻歲方慚增甲子，假年還溯降庚寅。無才敢冀常干祿，多病當知善養身。一事思量堪自慰，白頭依舊守清貧。

### 中夜忽寤不復成寐因賦以詩

人說不成寐，更長知未知。前途勞幻想，往事費追思。視夜頻開眼，耽吟屢撚髭。何如清睡好，還得夢佳期。

一月四日鴻賓署長來視疾感賦

臥病長安歷月餘，自慚久與故人疏。欣聞今日高軒過，臨去猶言慎起居。枕畔留箋記姓名，別僚對我盡關情。明朝聯席如相問，爲道頑軀已更生。

### 臥病兩月漸就痊可賦此自慰

兩月流光似箭馳，病中翻覺日遲遲。倦時擁被惟尋夢，悶裏攤箋偶作詩。自愧衰庸成老大，敢希腐朽化神奇。中西藥味均嘗徧，知有丹方疾可醫。

大寒前一日雪再疊飛字韻

曉來風定雪花飛密密同雲布作圍鴉伴柳眠遲喚醒鶴嫌梅瘦漸添肥圍爐客至宜沽酒埽徑人歸欲  
溼衣已是大寒時節近早春問訊隔年稀

亡室陳恭人遺物

釵荆裙布有誰如粗服留遺篋尙儲欲付姬人憑改作幾番檢點又躊蹰衣  
脂粉零脂盡可悲開篋益覺淚痕滋鏡中曾見驚鴻影無復臨窗挽髻時鏡

總座以江魚野豬等味徧餉僚屬余因病未與賦此並簡同人

碌碌終年爲口忙綠何佳饌未能嘗相如一病成衰廢難飫郇廚異味香  
虎頭燕頰羨諸君食肉還從骨相分努力加餐知有意投膠餉士勵吾軍

歲暮

律轉青陽歲欲除殘冬風物竟何如亂離何地尋安土老病侵人感索居闌鼓已催迎臘後新符待換立

春初獨憐急景凋年裏許復相偕挽鹿車

### 立春後二日雪仍疊飛字韻

曾向春前盼雪飛雪隨春至不成圍祇疑月掩梨花淡休讓霜欺竹葉肥久病困人難強飯峭寒侵客待  
添衣但期匝野祥雲霈莫使來牟瑞麥稀

### 祀竈作

東厨司命奉明神隨俗糝瓜色尙新莫怪黃羊今未備應憐中饋已無人

### 梅花

萬卉全彫茁凍芽衝寒何處覓芳華和羹莫怨年光晚此是先春第一花

### 辛巳除夕

去歲值除夕妻病猶在牀努力勸加餐勉爲進羹湯今夕歲又除人去餘空房家人默無語有妾心暗傷

強笑來慰我，杯盤羅酒漿。誰不感今昔，同此燈燭光。中庭祀先祖，懸像几筵張。我病跪拜難，未爇一瓣香。玉顏猶未改，遺挂已在旁。人天倏忽間，生死安有常。人生數十載，幾日少年場。無怪屠蘇酒，少小先舉觴。病軀盼回春，生氣期復康。守歲勿留戀，坐久覺夜長。環顧明燭下，嬉戲諸孫狂。闐然競六博，哀樂形神忘。

# 粹廬詩鈔卷四

天津劉潛芸生甫著

秋柳四首追和漁洋山人原韻

離情飄蕩又驚魂，落葉蕭蕭五柳門。  
十斛濃螺消鬢影，一絲殘黛減眉痕。  
馬嘶秋水誰呼渡，牛背斜陽遠見村。  
城郭參差無恙否，愁將詩思畫中論。

長隄幾處見新霜，強曳柔枝過藕塘。  
金縷人猶歌舊曲，舞衣今已曩空箱。  
畫眉忍憶張京兆，倚笛愁聽桓野王。  
多少樓臺流水地，不堪重說碧雞坊。

玉關何日寄寒衣，一闋驪歌是也非。  
紅板橋痕人去改，白門潮信晚來稀。  
西風蟬咽聲聲苦，暮雨鴉驚故故飛。  
贏得蘭成枯樹賦，江潭生意已多違。

遲暮秋光我亦憐，長條搖落淡含烟。  
愁人殘照留樽酒，送客旂亭試薄絳。  
瘦損纖腰應有恨，低垂青眼問何年。  
將軍一去飄零甚，畫角淒涼古戍邊。

後秋柳詩疊前韻

一腔離緒黯芳魂記取西湖蘇小門  
六代閒愁人易老十年秋夢水無痕  
酒旗搖曳白茅店篷艇欹斜黃葉村  
欲問絲蘿陰下曲送春歌後不堪論

長短枝梢墜曉霜素波嫋嫋下菱塘  
鏡迷搖碧三篙水綫壓疏黃十寶箱  
舞態猶翻大垂手商聲誰按小秦王  
記曾拾翠湖邊過紅襯桃花錦作坊

腰圍瘦損舞時衣幾處秋容晚黛非  
寥落鞭絲遊騎少婆娑鬢影酒人稀  
東風別我鶯猶語南國催寒雁又飛  
數徧白沙隄十里攀條今與故交違

一樹殘月不禁憐慘淡雙眉鎖冷烟  
流水空含情脈脈飛花消盡恨絲絲  
桓溫北去成遷客庾信南歸感暮年  
莫道別離都不管爲誰憔悴段橋邊

冬柳四首仍用漁洋秋柳詩韻

消盡江郎惜別魂  
笛聲淒咽上東門  
眼波冷覷誰青  
疎鬢雪寒侵  
滅黛痕  
疲馬一鞭荒葉徑  
飢鴉萬點夕

陽村蕭蕭落木長亭酒遲暮相逢意莫論

烏柏微明夜有霜枯枝瑟瑟墜寒塘牽絲幔冷慵拋綫織錦房空怕檢箱眉嫵彫殘憐去婦腰肢瘦損事  
醫王舞衣零落頭成白腸斷梨園舊教坊

密密曾纒遊子衣離愁匝眼綫痕非楊枝老去尋芳少桃葉歸來喚渡稀月下青驄難再繫天涯白雁自  
孤飛不堪重觸攀條感寸草春暉遠夢違

雨雪霏霏自可憐無因重畫綠絲烟折枝爭忍歌金縷倚鏡空教憶粉縣樵爨不須嗟晚景春衫留待惜  
芳年婆娑生意迎殘臘欲附梅花驛使邊

### 龍江春柳四律用漁洋秋柳詩韻

清明已過殢芳魂料峭餘寒靜掩門凝碧難描眉黛樣送青誰注眼波痕塵消客舍茫無路水隱漁家別  
有村回首鳳城千萬樹絲絲綠意忍重論

一出榆關便耐霜春來冰泮滿方塘臨風強欲歌金縷補月纔宜結綺箱曾引柔情牽桂子試傳芳訊託  
花王白門多少新詩料空寄緘題錦字坊

無端晴雪點征衣，莽莽平沙極目非。  
灞岸春遊陳跡改，蘇隄曉夢隔年稀。  
花驄欲去愁環繫，乳燕頻捎倦  
尙飛孤負豔陽三月節，依依猶與故枝違。

倡條冶葉劇堪憐，何處樓臺銷暝烟。  
雁寒塞滑方倚笛，龍城春冷不飛緜。  
迎人濯濯看今日，送客勞勞憶  
去年。莫道娉娉生意盡，數枝搖曳嫩江邊。

### 白門春柳四首用漁洋秋柳詩韻

年年春夢逐離魂，紫塞歸來又白門。  
倦眼將舒知有意，纖眉初畫未成痕。  
欲尋舊跡柴桑里，擬卜新居水  
竹村。幾度蓮花橋北望，短長枝葉共誰論。

曾向龍沙歷曉霜，尋芳無那過橫塘。  
折枝牽恨歌金縷，壓綫添愁檢翠箱。  
送客勞勞纔識李，當春濯濯尙  
思王。梢頭一抹秦淮月，還照青門錦字坊。

關山雨雪去時衣，客子重遊或昨非。  
徙宅日長眠起適，渡江人遠送迎稀。  
拚將英溷隨花落，悟得萍因任  
絮飛。杆說願從陶令隱，南來春意已多違。

烏鳥情絲亦可憐，臺城依舊綠籠烟。  
曲中別怨惟聞笛，江上餘寒未脫絛。  
繫馬高樅更何處，棲鴉流水又

經年液池不少楊枝露誰爲移根近日邊

### 白門秋柳四首用漁洋詩韻

江南千里共招魂極目悲秋到白門  
淒咽哀蟬聲有恨寒驚新雁夢無痕  
飄零大樹將軍第寂寞孤松處  
士村愁絕勞勞亭上客者番離別不堪論

菊花天氣見朝霜濃蔭凋殘半畝塘  
眉樣愁添分寶鏡腰圍瘦減閉金箱  
難尋賸水臨淮壘尙憶中山異  
姓王閒立夕陽無一語古槐疏映大功坊

蕭蕭落葉滿征衣絮果萍因盡覺非  
楚幕啼烏秋月冷漢營回馬曙星稀  
牽愁忍見魚魚貫弔影還憐燕  
燕飛別有金城流涕事暮年心已與時違  
幾條感舊幾人憐六代江山欲化烟  
誰向空庭吟謝絮曾看深巷糝吳縣  
傷心轉綠當何日生眼垂青止  
隔年不盡秦淮鳴咽水更堪相送石城邊

### 虹橋秋柳四首用漁洋詩韻

蕭疏秋柳伴吟魂行過虹橋憶白門  
十里春風溫舊夢二分明月賸殘痕  
林間黃葉同飛絮湖上青山別

有村回首繁華消歇盡綠楊城郭不堪論

玉露初涼未結霜寒烟蔓草徧雷塘依依客燕猶尋壘皎皎牽牛尙服箱枯樹待廢開府庾冶春誰繼阮  
亭王故宮眉史翻新樣莫問揚州舊教坊

弱線難添金縷衣十圍依舊昔人非迎來桃葉留春少老去楊枝願曲稀隋苑螢光空自照蕪城鴉點欲  
爭飛瓊花零落渾無主攀盡長條生意違

娉娉嫋嫋不禁憐卷上珠簾隔暮烟折柳歌殘三弄笛染衣汗冷幾重緜白頭浪迹隨萍水青鬢風流讓  
綺年載酒儻尋修禊事春來仍綠大隄邊

### 憶長隄春柳四首仍用漁洋秋柳原韻

折柳初歌已斷魂長隄洄溯鎮淮門銷金壓綫添新樣載酒題襟記舊痕殘月曉風芳草渡小橋流水綠  
楊村春歸強欲留春往往事低回忍再論

柔條攀折幾經霜曾步平山數里塘搖碧有情牽畫舫送青何處挽車箱依依雪裏方歌雅濯濯風前卻  
憶王昔日十圍無恙否年來愁說鬪雞坊

羞將殘汁染春衣，回首名闌迹轉非。百轉黃鶯音曉曉，重來紫燕語依稀。浮蹤竟任飄萍去，短夢還憐脫絮飛。修禊虹橋虛後約，唱酬今與故人違。

雨絲風片儘堪憐，一棹臺城鎖綠烟。舊畫修眉濃似黛，低垂纖手軟于絲。青山可有重遊日，碧玉難逢未嫁年。羌笛何時消朔雪，尋春迴棹瘦湖邊。

### 長城秋柳四首仍用漁洋韻

榆關難返舊征魂，楊柳依依望薊門。羌笛吹殘枝已折，戰袍綻盡絮無痕。風寒燕雀軍中暮，日夕羊牛劫後村。力竭聲嘶秋未斷，鳴蟬哀怨向誰論。

遼陽征戍幾星霜，回首燕雲阻石塘。拂向旌旗曾易幟，伐餘條肆尙求箱。殘眉舊識風流尹，冷眼羞窺日逐王。一滴楊枝甘露徧，菩提何處表丹坊。

同袍誰更賦無衣，一片孤城景物非。少婦樓頭閨夢斷，亞夫營裏羽書稀。安期春燕還巢去，空見昏鴉作陣飛。搖落江潭如此樹，迴黃轉綠願終違。

改柯易葉古今憐，昔日青青臘晚烟。化碧經秋疑瘞血，飛黃委地不成緜。難尋陶令臨江宅，忍溯桓公種

樹年萬里長空關月冷何人猶記柳條邊

### 丁沽秋柳四首仍用漁洋秋柳詩韻

烟樹安西欲斷魂，舊居還記帶河門。  
柔條難繫浮雲意，病葉猶霑墜露痕。  
八里臺荒瓜蔓水，一年秋老杏花村。  
分明丁字沾前路，楊柳青邊漫共論。

二分烟月九秋霜，綠暗難遮脂粉塘。  
野寺海光驚戍角，妝樓黯雪罷開箱。  
還期草長鶯求友，莫羨槐安蟻有王。  
唱到大隄人不見，水西莊外待題坊。

四十年前舊染衣，東風寒食綫痕非。  
鹽關亭圯人初去，學海堂空樹亦稀。  
雙港月涼魚並貫，七臺霜緊雁孤飛。  
燈窗擬續先生傳，懷葛襟期與世違。

飄萍蹤迹得天憐，千里金隄隔冷烟。  
梅社塵埋誰撼笛，竹林村近不吹絃。  
錦帆拂水懷前事，玉樹臨風憶少年。  
七十二沽秋欲盡，一星猶耀潞河邊。

### 蓮池秋柳仍用漁洋詩韻

別後蓮池繞夢魂，重來垂柳正當門。  
新翻花樣催風信，舊種萍因賸水痕。  
藻詠空留君子館，稻香誰話老

農村青青客舍應無恙三疊陽關忍再論

千門萬戶月如霜曾聽宮鶯過綠塘葉落猶傳金縷曲條分難綰翠雲箱蟬聲咽斷憐齊女鵲血嘯殘怨  
蜀王留有液池人字樣故都秋冷九龍坊

路曲陰濃映繡衣元戎小隊昔遊非風鳴笳角黃初落露拂旌旗綠亦稀胡馬秋肥難並繫飢鴉暮散尙  
紛飛漢南休問將軍樹春渡江梅事已違

濯錦亭西顧影憐侯家何處散輕烟情絲未斷仍牽藕密線猶縫已綴縣敢惜勞勞同往日難忘濯濯是  
當年兼葭秋水伊人在洄遡泉源一畝邊

### 潞河新柳用漁洋秋柳原韻

往日依依柳下魂春風先入漑輪門柔條漸透黃金色弱絮初分白紵痕莫向蓮池尋舊徑試從榆社問  
農村鳳城咫尺韶光換誰與東君子細論

衝寒曾踏板橋霜四十年前舊石塘渺渺夕波牽估舫蕭蕭秋葉撲車箱高樓鐘動驚羈客古塔鈴喧展  
梵王漸覺眼前春意轉重來如夢碧雞坊

緇塵未浣換春衣，城郭人民是也非。  
壓線頻年青眼少，繁條前度白頭稀。  
林梢日煖鶯初囀，水上風多燕又飛。  
消盡餘寒三月暮，折腰依舊與時違。  
眉樣新翻只自憐，龍舟往事已如烟。  
微波託意泥沾絮，清露添痕雨漬縣。  
夾岸飛花仍處處，大隄流水更年年。  
一聲長笛離亭晚，目送金臺夕照邊。

蘆溝秋柳四首用漁洋秋柳詩韻

送客蘆溝屢斷魂，離愁根觸望京門。  
殘宵難續春閨夢，逝水空留曉月痕。  
曾見扶疏江令宅，至憐零落海王村。  
秋來多少傷心事，回首東風不可論。

九月涼秋露結霜，蕭蕭落木下寒塘。  
棲鴉欲散還成陣，繫馬無緣漫負箱。  
往日投壺逢玉女，何時衣錦問錢王。  
不堪拱極城頭望，燕市淒迷舊酒坊。

菱荷換盡水田衣，無定河邊景色非。  
漢苑哀蟬秋後斷，隋隄啼鳥晚來稀。  
愁看月下雙蛾鎖，爭逐風前一騎飛。  
此去城南天尺五，液池春夢久相違。

淒風苦雨最堪憐，城闕消沈萬竈烟。  
遠纒蘆花秋瑟瑟，低縈蔓草恨緜緜。  
前游忍溯桑乾水，後約相期菊

隱年共盼來春芳信早朝陽和煦石橋邊

### 液池春柳四首仍用漁洋秋柳詩韻

草綠瀛洲欲返魂清遊遼朔陟山門因依西苑添春色憑藉東風解凍痕  
鏗燧東瞻香辰殿編籬誰問石  
濠村故都無限興亡感離亂經年未忍論

寶月樓空歷十霜重張翠幃障銀塘畫眉添黛詞人筆纖手縫裳  
季女箱紅杏園林憐小宋綠楊城郭憶  
諸王太平橋畔應無恙舊宅依稀錦什坊

買醉何人日典衣春來春去已全非畫船簫鼓波初煖毳幕旌旗露漸稀  
接葉流鶯猶共囀離巢乳燕莫  
高飛記從南府笙歌歇桐月軒中心事遠

眠起隨人自可憐團城猶帶漢宮烟玉泉東注風飄絮瓊島南迴雪綴絲  
青眼漫看長樂老白頭休說水  
和年何當乞借楊枝露春滿樓臺北海邊

### 液池秋柳四首仍用漁洋詩韻

會展春旌喚國魂新華門接福華門園林忽地添秋氣池館誰家隱暮痕  
清淺蓬萊猶問渡蕭疏水竹不

成村涼陰尙翳瀛臺月曉色蘆溝漫較論

孤塔凌霄白糝霜臨流倒影界銀塘畫船欲繫爭牽纜弱線難添試檢箱舊苑銜花歸鹿女空壇證果睡

獅王金鰲玉螭秋蕭瑟幾度平橋換彩坊

西風輕颭綠荷衣卅字迴廊景物非舊種漢南看隱約新營灞上認依稀黃門葉落哀蟬咽紫閣簾深客

燕飛競說芙蓉初日好暫時相伴莫相違

漪瀾堂外見猶憐一水盈盈隔暝烟髻髮已斑羞覓鏡圍腰初減怯裝綿記從粟里移官日溯向華林獻

賦年回首江南好風景并春同盼液池邊

### 冬柳四首仍用漁洋秋柳詩韻

玉梅何日返香魂老柳毵毵尙薊門朔雪頻添殘鬢影東風難展舊眉痕參差落木連荒戍愛護餘條認

別村莫怨年來攀折苦青青空向曲中論

周京正月隕繁霜水鑿冲冲隔野塘三疊侑觴虛酒舫五紋添線冷鍼箱相期皓首依陶令肯學織腰伴

楚王記否春陰瓊島外堆雲積翠贖宮坊

春暉難駐憶縫衣，柳光陰廿載非。江上潮寒黃浦遠，林梢月冷白門稀。啼鳥反哺音猶在，噪雀爭枝凍不飛。咫尺鄉關歸未得，聲聲臘鼓與心違。

枝枝葉葉總堪憐，古木寒鴉萬戶烟。畫意欲描歸冷淡，柔情不繫轉纏綿。生稊莫漫傷枯樹，強幹還須藉晚年。舒向岸容方待臘，春光漏洩到君邊。

### 液池新柳仍用漁洋秋柳詩韻

已讓梅花逗玉魂，迎春還傍故宮門。嫩黃初綻描金色，淺碧纔舒點翠痕。低映重簾臨水榭，斜牽短艇擬江村。餘寒未卻清明近，植樹年年待較論。

陽和漸轉不霏霜，陰蕩晴光一鑑塘。垂向釣絲波作鏡，添來衣線水爲箱。堆雲挹秀延詞客，滴露流甘仗法王。深淺入時誰記取，新翻眉樣問宮坊。

琉璃凍解浣春衣，御水微波眼底非。殘月曉風行客早，輕塵朝雨故人稀。朱欄向煖枝初動，白塔淩虛絮未飛。幾度五龍亭上望，樊條心與昔時違。

生機活潑自天憐，寒食光陰正禁烟。手挽柔荑猶婉孌，眼窺芳草共芊緜。軟紅塵界留春夢，慘綠風流學

少年莫笑先生腰，尙折濃陰重被鳳城邊。

稷園春柳仍用漁洋秋柳詩韻

東風拂柳引詩魂，繚繞重垣隔午門。笛譜玉關增舊感，橋通金水展新痕。難忘邗上題襟館，誰問江南賣酒村。猶有稷園春色好，垂楊終古莫推論。

糝徑花舖又履霜，溶溶新水漫平塘。纒絲隨地垂千縷，祈穀當年祝萬箱。興廢兩朝哀夏社，陽和三月紀春王。銅駝荆棘人何處，綠樹紅欄白石坊。

京洛緇塵易浣衣，春情撻亂是非眉。梢眼角傳來慣絮果，萍因悟後稀水榭。影遮魚並聚石欄，陰覆燕雙飛。韶光處處催人老，走馬章臺願早違。

五方土色更誰憐，草空壇襯綠烟細。葉迎風輕試翦橫橋，隔水自飛絲。臨軒掩映來今雨，纒屋扶疏似昔年。日暮天安門外路，衣香鬢影碧陰邊。

稷園秋柳四首仍用漁洋詩韻

宮牆西畔歛芳魂，苑柳依稀魯門消。夏尙宜延夜景，迎秋偏自寫朝痕。曾從池北譽嘉樹，莫向城南覓

舊村水榭年年張畫本柔條長短漫評論

物換星移已十霜休將小字問錢塘攀枝倚笛愁中酒壓線添衣怕檢箱蒿目更誰祠土穀折腰猶欲傲  
侯王西風又見秋蕭瑟記否當年戰勝坊

拋將秋扇換秋衣流水斜陽照影非疏葉微黃朝露冷涼陰餘綠晚烟稀消沈西掖聞蟬唱搖落南枝見  
雁飛回首鶯花二三月白門風景意多違

故都喬木耐人憐惆悵侯家日暮烟太液波通同澹絮禁林寒早待裝縣忍尋蓮葉東南路憶踏槐花子  
午年迴溯中央今宛在願留餘蔭古城邊

### 長河新柳仍用漁洋秋柳詩韻

柳上春回杜宇魂長河一道郭西門絲添短髮留殘影黛染纖眉識舊痕桃葉迎人重喚渡杏花臨水自  
成村東風漫道江南好九曲清溪欲共論

白石橋西記履霜龍舟何處賸芳塘林間鞭影捎金縷陌上衣塵展翠箱閨月含愁憐少婦爐烟添靄憶  
當王涵虛遠招昆明水萬壽山前認寶坊

餘寒未解尚添衣，五色春旂轉瞬非。說向白頭宮女怨，看來青眼吏人稀。浴波乳鴨先知煖，接葉雛鶯又學飛。昔日讀書堂在否，十圍無恙與心違。

臺城舊迹亦堪憐，五塔崢嶸入曉烟。弱絮隨波還泛泛，柔條踈地自縣縣。青迷客舍流觴日，紅隱宮牆倚笛年。安得沿隄千萬樹，尋春直到碧雲邊。

### 燕臺春柳四首仍用漁洋秋柳詩韻

燕臺楊柳逗春魂，烟樹微茫古薊門。官道嫩黃迎日色，御溝新綠離波痕。五亭橋憶淮南岸，八里莊連河北村。故國常留喬木在，蔥蘢佳氣待重論。

枯榮幾度閱星霜，千頃汪波又滿塘。欲展旌旂張翠幕，強裁刀剪啓金箱。連營廢壘思諸將，舊苑荒臺說讓王。一片花飛誰捉得，兒童喧逐鬪雞坊。

青青猶是舊時衣，舞袖郎當笑昨非。燕識故巢南去少，鶯爭煖樹北來稀。塵心肯被長條繫，浪迹空隨落絮飛。縱使黃金增價重，折腰終與夙懷違。

望春東望爲春憐，萬柳堂空隱暮烟。一鑑池塘風淡淡，九門城闕雨緜緜。畫眉夫壻封侯日，染汁郎君及

第年三十六宮何處是依依猶傍玉河邊

### 臺城春柳四首用漁洋秋柳詩韻

亭亭倩女忽離魂楊柳春風隔玉門  
白下有山尋舊迹青溪無浪展新痕  
讀書堂接龍蟠里沽酒旂挑犬  
吠村目極秦淮逝水金陵王氣可能論

慘綠年華鬢未霜停船何事問橫塘  
新描眉樣羞窺鏡細束腰圍怯啓箱  
借隱難招林下客含情猶睇汝  
南王羣鴛飛繞江南路草沒朱門識舊坊

青簾白舫換春衣玄武湖邊觸處非  
三月烟花增嫵娜六朝金粉認依稀  
雞鳴有寺深深見燕去還巢故  
故飛誰更豁蒙樓上望漢南司馬願終違

無情江水至今憐落日汀洲起夕烟  
九派橫流通蜀錦半林晴絮壓吳縣  
鬱金香散飛花地幕府春深植  
樹年留得清涼山色好任他攀折冶城邊

### 曲陽新柳四首和郭漁邨明府原作用漁洋秋柳韻

誰引長條絆客魂欣欣生意滿東門  
黃迴葉底纔添色綠染枝梢漸著痕  
夾岸低迷芳草渡平林遙挹棗

花村嘉山老柳應無恙，劫後風光不忍論。

荒涼兵燹已三霜，雙塔猶存影入塘。巢燕無家惟擇木，服牛何地更求箱。小園枯樹吟開府，古國中山溯

漢王

定州爲漢中山王國  
曲陽在屬定州境

願展新陰同蔽芾，甘棠相映舊官坊。

雪來柳社尙戎衣，拂拂征塵舉目非。落絮游絲情緒薄，清風明月夢痕稀。衙鄰嶽廟流鶯囀，營列春郊去馬飛。一曲涓城朝雨後，陽關西出故人違。

空城斗大可矜憐，寒食人家啜斷烟。落葉添薪曾作爨，柔荑試翦欲搓絛。滄江一臥頻驚歲，漢苑三眠莫

問年。寄語冰心池上客，聯吟記否潞河邊。

昔年有潞河新  
柳春柳詩什

### 江亭秋柳四首仍用漁洋原韻

江郎賦別黯消魂，衰柳低迷近郭門。蝶化餘香沉斷夢，鶻啼膿血漬殘痕。參差落木難藏寺，斜磬疏籬自結村。誰更陶然同一醉，繁臺高處不堪論。

野菊初黃欲降霜，風欹卓帽過林塘。羞歌金縷翻新曲，愁檢瑤華啓舊箱。淨土一坯埋醉郭，涼颿九月送屠王。層城側望西山暮，滿樹斜陽白紙坊。

重九登高試袷衣，青春鸚鵡想非非。  
樓臺近水林陰薄，門巷經年樹影稀。  
蟬曳殘聲秋欲斷，鴉銜餘照晚猶飛。  
紅塵一角長安市，三起三眠願已違。

古臺搖落亦堪憐，丹鳳城南入暝烟。  
荷盡枯黃同泛梗，蘆荒垂白自吹絛。  
惜花鬱鬱埋香地，折柳勞勞送別年。  
仍是春秋佳日好，青旂常映五雲邊。

### 淀園秋柳仍用漁洋原韻

杜宇難回帝子魂，鬢髮疏柳繞宮門。  
畫中諧趣迷陳迹，劫後圓明臘舊痕。  
五塔寺空餘古木，六郎莊近接新村。  
清華朗潤俱搖落，留有頤和尙可論。

晞髮陽阿鬢有霜，牽車猶記傍蓮塘。  
疏陰帶月移金砌，脫葉因風墮玉箱。  
輦路春游招北使，瑤池宵宴罷西王。  
長條未改青山色，掩映涵虛雨字坊。

滄江歲晚舊朝衣，七載郎官夢已非。  
曲徑雨荒游屐少，長橋波冷畫船稀。  
白鷗南浦還同泛，黃蝶西園正對飛。  
幾度榮枯都閱盡，看人青眼與時違。

昆明湖上影相憐，眠起空含禁苑烟。  
老去耽吟猶壓綫，秋來寄遠欲裝緜。  
金莖承露游仙境，玉殿排雲祝

殿年不盡名園興，廢感殘蟬聲咽夕陽邊。

### 窰臺春柳四首用漁洋秋柳詩韻

窰臺在都城之南下，窪其北有三聖菴。亡室遺榿暫厝於此門前，老柳當春復榮對景，思人不無感觸。  
爰成短什，用抒余懷。

窰臺何處爲招魂，目極心傷五柳門。蟬鬢空留當日影，蛾眉猶記舊時痕。江南桃葉曾呼渡，橋北蓮花共結村。莫怪江亭離別苦，故人西去忍重論。

絃柱華年兩鬢霜，停船誰復憶橫塘。畫圖省識悲看鏡，針線留存怕啓箱。欲翦情絲依繡佛，枉勞仙餌乞醫王。飛花如雪城南路，撩亂春愁錦什坊。

悵望新春白袷衣，樓臺鸚鵡夢全非。陽關一去青難斷，漢苑重來綠尚稀。薇露又聞鶯百囀，棟風徧妬燕雙飛。金城感舊人何在，羅帶同心與我違。

柔荑垂手想夫憐，紫玉消沉已化烟。絮果萍因情默默，雨絲風片恨絲絲。攀條忍過尋芳地，染汁難忘及第年。安得栽同連理樹，長春枝蔭畫樓邊。

卍園春柳四首仍用漁洋秋柳韻

辛巳晚春因病暫入德國醫院診療後園病室可以棲遲垂柳數株掩映窗外其西平舍適爲亡室去年養病之所因物興感不能忘懷爰以卍園春柳名篇悵然有作

海外靈香說返魂數株垂柳綠迎門棲禽易散餘殘照巢燕重來認舊痕苔迹難尋人去徑萍因空溯客愁村青青猶是春風面病裏相看意莫論

娉婷弱質不禁霜春水初生天漫塘潘鬢堆愁摧玉鏡楚腰留影秘瑤箱薪添落葉吟元相笛倚空聲問野王閒却畫眉京兆筆含毫誰繪翠雲坊

舊侶相逢盡白衣楊枝駱馬是疑非疏星入戶燈初上殘月窺窗漏漸稀萬種柔情絲並裊一場春夢絮同飛桐柯別抱孤生感眠起因人與願違

勞勞屢綫自堪憐卍字旗開帶曉烟葉可重生風作翦花難常好雪霏縣人疑桑下經三宿春到枝頭又一年依樣樓臺青未了忍將離別話吟邊

柳枝感舊吟

讀雅言集見樂靜居士柳枝懷舊詞有悲往事振觸余懷因易新題踵成短什計得詩六十二首敢云  
言志聊以追記舊游云爾

萍蹤生小託江鄉嶺表歸來日漸長飛絮漫天無定所春來春去爲惟忙  
煖風披拂武昌城鸚鵡洲前綰送迎一水盈盈人喚渡漢陽門外綠初成  
誰引輕帆過洞庭長沙南去昔曾經四圍濃翠環湖水映入君山一色青  
風輕雲淡早春天飛鳳山高繞漳川樊圃人家斜日裏飛花晴撲一溪烟  
兩隄疏樹蔽朝暉長路驅車去若飛冷落岸容方待臘咸陽古渡雪霏霏  
少孤爲客滯他鄉一種深情說渭陽飛入硯池花點點綠陰深護讀書堂  
馬首東廻客舍遙車塵輕迥雨瀟瀟鳴蜩五月長安道一路青青送灞橋  
沙平草淺渺無垠滾滾黃流入孟津一片濃陰青不斷臨風牽挽渡河人  
拂城垂柳認吾家溝水當門對日斜初到故鄉還似客二分烟月衛河涯  
風帆一葉入杭州綠樹經秋葉尙稠林影隔簾燈影動月涼如水背湖樓  
春風似翦試柔荑綠徧蘇陵又白隄蘭槳一雙打波去流鶯嘯殺斷橋西

五年小別又還家，盼到庭柯感歲華。卻怪丁沽春事晚，清明寒食未飛花。  
槐黃初作玉京游，五闌臨河障急流。行過便橋天路近，垂陽陰裏運糧舟。  
西山凝望鬢回頭，日出平林宿雨收。破曉騎驢東郭去，蕭蕭黃葉下通州。  
潞河東望綠粼粼，一抹晴烟曉尚含。欲挂雲帆濟滄海，又隨秋雁過江南。  
幾度餘杭唱折枝，門前新綠已成絲。空庭閒卻梧桐月，移送疏陰過舫窻。  
翮然歸棹自錢塘，相送臨歧別路長。密密縫衣慈母線，春風吹夢早還鄉。  
十載鄉關久索居，春來繞岸蔭扶疏。小園枯樹年年綠，自掩蕭齋讀我書。  
雲臺山迴翳層層，閱盡榮枯感廢興。漢苑三眠人去後，依依猶傍獻王陵。  
移家託蔭泮宮旁，暇日尋芳掉野航。欲取漁竿彈脫絮，一林晴雪水西莊。  
海天風引到蓬瀛，樹色嵐光處處迎。水國偏知春意早，山居二月已聞鶯。  
二重橋外水濛濛，柳下和風拂面來。萬緣森森新月上，隅田川裏泛舟回。  
風流張緒溯當年，勝蹟潛通一畝泉。寥落行宮金殿閉，古槐相映夕陽邊。  
買鄰買宅近皇都，門巷幽深樹數株。燕市月明庭院靜，涼陰滿地碧雲鋪。

郎署曾攀長短條，曉風殘月御河橋。  
疏星欲落旌旂動，露溼春衣侍早朝。  
文瀾湖上綠烟絲，玉笛聲中惜別離。  
留得故人一杯酒，春風回首倚欄時。  
三面林陰夾岸青，佛山倒影映清冷。  
晚涼風動微波起，自繫輕舟歷下亭。  
永豐西角認新坊，秋葉初黃欲降霜。  
爲問上林多少樹，昏鴉無數集宮牆。  
新華門啟勝初題，萬縷千條夾路齊。  
宮樹不知朝市改，春來猶綠禁垣西。  
海上神山再到時，新橋秋色最繁枝。  
依稀江戶川前水，猶見柔條裊釣絲。  
日光山下軟塵消，壺嶠秋深綠未彫。  
掩映朱欄誰寫照，嵩山蒼翠擁神橋。  
廿年重到小瀛洲，翠幄周遮樓外樓。  
秋樹迎人風淡淡，似曾相識掠行舟。  
姑蘇城外數郵籤，落絮游絲盡入簾。  
眉樣描成螺黛細，畫樓新月影纖纖。  
朔風獵獵出居庸，木落參差見遠峯。  
白草黃榆相映帶，雁門關外曉霜濃。  
移根忽近嫩江邊，謫宦棲遲已隔年。  
出塞悲歌留舊句，龍城春冷不飛鷄。  
塞上回車又渡江，楊枝無力逐風降。  
銜泥漸覺新巢穩，燕子呢喃慣作雙。  
九曲青溪舊板橋，隔河燈火逗涼宵。  
梢頭斜挂秦淮月，歌管留人繫畫橈。

旌旆飛揚入石城將軍大樹凱歌聲名園依水人何在誰憶當時漢將營  
莫愁湖畔水無涯裊裊風絲拂岸斜來去鬱金堂上燕尋春猶識阿侯家  
潯陽江水日潺湲綠隱長林界碧山送客勞勞人已遠琵琶亭上待春還  
春城笳鼓戟門開幾日軺車往復回雪聚花濃三月暮洛陽橋下艤舟來  
亭皋落木碧峯頭愛晚頻登埽葉樓流水棲鴉蕭瑟甚西風吹斷白門秋  
罷官陶令寄閒身陋巷幽居滬濱濱江上朝朝頻惜別離亭送盡北歸人  
杏花時節夢惺忪眠起隨人意自慵羞向清流照絲鬢一江春水翦吳淞  
慣把燕臺作故鄉十圍無恙向人長庭前舊種恒春樹久別還須解帶量  
退思軒外綠成陰長日衙齋暑不侵最是晚涼無客到綠槐深院聽蟬吟  
鳥上春回一瞬中雨絲風片太忽忽旁人何事勞攀折讓與櫻花作態紅  
湖上重尋秋柳園枝枝葉葉尙當門西風殘照無新句牘有奚囊舊墨痕  
山接胸陽擁翠微茫茫烟水送斜暉荒寒近海無城郭綠徧沙隄樹作圍  
綠楊村近說揚州瘦到西湖自可留欲向虹橋尋舊夢長隄秋影浸寒流

濯濯丰姿尙憶王，冶春風雅繼漁洋。  
棗蕪滿徑題襟館，猶有金絲別樣長。  
市隱津沽歷幾春，小樓一角靜鷺塵。  
陰夏木圖書館蔭，曷還思種樹人。  
拂水臨風認故枝，霜皮黛色李侯祠。  
枯楊莫怨生稊晚，自有迴黃轉綠時。  
蓮池重到憶前塵，濯錦亭邊不見春。  
淥水芙蓉葉彫謝，盡留青眼睨游人。  
潞水環城日夜流，十年樹木紀春秋。  
新陰一夕風摧盡，落日紅沈近水樓。  
盧溝橋下水粼粼，曉色穿林月一輪。  
霜雪侵陵太懣悴，更無餘力絆行人。  
拂拂青旗颺麴塵，園林烟景一時新。  
東風吹綠瀛洲近，不是靈和舊日春。  
年來頻作柳枝吟，太液微波託興深。  
舊苑枝柯多改易，淀園秋老最傷心。  
前朝題碣委秋塵，人字猶留三海濱。  
此樹婆娑生意盡，新枝別挺又長春。  
珊瑚環珮想歸魂，人去空帷靜掩門。  
寶鏡塵埋明月隱，畫中無復舊眉痕。  
瘦損東風感逝波，傷春無奈別離何。  
情絲未斷愁難續，應比金城涕淚多。  
願與梅花共歲寒，病中詩卷寄情寬。  
欲求懷葛長年術，且向先生傳裏看。

↓ ↓  
721051  
(1)